

SCENO IX

D.^a Francisca, Rita

RITA.—Kiel petolema li estas!... Sed... dank'al Dio, don Felix tie ĉi!... Jes, li amas ŝin, tio estas videbla. (*Eliras Kalamoĉo de la ĉambro de don Carlos, kaj foriras tra la centra pordo.*) Ho, lasu ke oni parolu; estas viroj tre ĝentilaj; kaj tiam, kion povas fari virino? Ilin ami, devige, ilin ami... Sed, kion diros la fraŭlino kiam ŝi vidos lin? Ĉar ŝi estas blindenamigita por li. Karulino! ĉu ne estus domaĝe se... Jen ŝi estas.

D.^a FRAN.—(*Enirante.*) Ho, ve, Rita!

RITA.—Kio estas? Ĉu vi ploris?

D.^a FRAN.—Ĉu mi ne devas plori? Se vi estus vidinta mian patrinon... Treege decidinta, ke mi amu tiun homon. Se ŝi scius tiun homon. Se ŝi scius tion, kion vi scias, ŝi ne ordonus ke mi faru neblaĵojn... Ke li estas tiel bona, ke li estas tiel riĉa, ke mi estos tiel feliĉa kun li... Ŝi tre kolorigis kaj nomis min fripona, malobeema... Malfeliĉa mi! Ĉar mi ne mensogas nek scias hipokriti, pro tio ŝi nomas min fripona.

RITA.—Fraŭlino, pro Dio, ne estu tiel malĝoja.

D.^a FRAN.—Ja, ĉar vi ne aŭdis ŝin... Kaj ŝi diras, ke don Diego plendas, ke ni nenion diras al li... Tro diras mi al li, kaj mi tre penadis ĝis nun ŝajniĝi kontenta, kun li, kiel mi neniel estas, kaj

rideti kaj babili... Kaj ĉio por kontentigi mian patrinon, ĉar se ne... Sed la Virgulino bone scias ke tio ne venas el mia koro. (*La teatro komencas mallumiĝi iom post iom.*)

RITA.—Ho, ĉesu, ne estas ankoraŭ necesa tiom da maltrankvileco! Kiu scias?... Ĉu vi ne memoras jam tiun feliĉan tagon, kiun ni pasigis la lastan jaron en la kampodomo de l'administranto?

D.^a FRAN.—Ho, kiel mi povas forgesi ĝin? Sed... kion vi volas diri al mi?

RITA.—Mi volas diri ke tiu sinjoro, kiun vi vidis tie kun la kruco verda, tiel ĝentila, tiel bele vestita...

D.^a FRAN.—Kiom da paroloj!... Don Felix... Kaj, kio?

RITA.—Kiu akompanis nin ĝis la urbo...

D.^a FRAN.—Bone... kaj poste li revenis, kaj mi vidis lin, malfeliĉe, multajn fojojn... malsaĝe konsilita de vi.

RITA.—Kial, fraŭlino? Kiun ni ofendis? Gis nun neniu en la monaĥinejo suspektis tion. Li neniam eniris tra la pordoj, kaj kiam nokte li parolis kun vi, estis inter vi du spaco tiel longa, ke vi ofte malbenis ĝin... Sed tio ne estas la afero. Kion mi volas diri al vi, tio estas, ke estas neeble, ke amanto kiel tiu forgesu sian adoratan Francinjon. Konsideru ke ĉio, kion ni sekrete legis en romanoj ne valoras, kion ni vidis ĉe li. Ĉu vi memoras tiujn tri manplaŭdojn kiuj aŭdiĝis inter la dekunua kaj la dekdua nokte? kaj tiun sonan frapeton tiel delikatan kaj signifan?

D.^a FRAN.—Ho, Rita! Jes, mi ĉion memoras kaj dum mi vivos mi konservos la memoron. Sed li forestas, kaj eble amuzas sin per nova amindumo.

RITA.—Mi ne povas tion kredi.

D.^a FRAN.—Sed li estas viro, kaj ili ĉiuj...

RITA.—Kia sensencaĵo! Ne trompu vin, fraŭlino. Ĉe viroj kaj ĉe virinoj okazas tio sama, kio okazas ĉe la melonoj de Añover'. Estaj bonaj kaj malbonaj; kio ne estas facila, tio estas elekti. Kiu rezultas malfeliĉa en la elekto, tiu kulpigu sian ŝancon, sed ne mallaŭdu la komercaĵon... Estas viroj tre trompemaj, tre friponaj; sed estas neeble, ke tia estas li kiu donis tiom da pruvoj de amo kaj persisteco. Tri monatojn daŭris la serenado kaj sekreta interparolado, kaj dum tiu tuta tempo vi bone scias, ke ni neniam vidis ĉe li agon neĝentilan, nek aŭdis ĉe lia buŝo vorton malhonestan aŭ malrespektan.

D.^a FRAN.—Estas vere. Tial mi amis lin multe, tial mi havas lin tiel fiksita tie ĉi... tie ĉi... (*Ŝi montras sian bruston.*) Kion estus li dirinta kiam li ricevis mian leteron? Ho, mi bone scias, kion li dirus... Ho, jes!... Estas domaĝe!... Tre certe... Kara Francinjo!... Kaj ĉio finiĝis... Li sendube ne dirus pli... nenion pli.

RITA.—Ne, fraŭlino, li ne diris tion.

D.^a FRAN.—Kion vi scias?

RITA.—Mi bone scias. Kiam li legis la leteron li tuj estus ekveturinta kaj venos flugante konsolisian amikinson. Sed... (*Alproksimiĝante al la perdo del ĉambro de donja Irene.*)

D.^a FRAN.—Kien vi iras?

RITA.—Mi volas vidi, ĉu...

D.^a FRAN.—Ŝi skribas.

RITA.—Ŝi, do, devos baldaŭ fini, ĉar komencas noktigi... Fraŭlino, tio, kion mi diris estas ĉio tute vera... Don Felix estas nun en Alcalá.

D.^a FRAN.—Kion vi diras? Ne trompu min.

RITA.—Tiu estas lia ĉambro... Kalamoĉo ĵus parolis kun mi.

D.^a FRAN.—Cu vere?

RITA.—Jes, fraŭlino, li jam eliris lin serĉi tial ke...

D.^a FRAN.—Do, li amas min! Ho, Rita, kiel bone ni agis avertinte lin... Sed ĉu vi vidas tian ĝentilecon?... Ĉu li fartas bone?... Veturadi tiom da mejloj sole por vidi min... ĉar mi lin ordonis...! Kiel dankema mi devas esti por li! Ho, mi promesas ke li ne plendos pro mi. Eterna dankemeco kaj amo.

RITA.—Mi nun iros serĉi kandelojn. Mi penos restadi tie malsupre ĝis kiam ili revenos. Mi tiam scios, kion li diras kaj intencas fari ĉar dum ni estos ĉiuj tie ĉi povas okazi ia terura batalo inter la patrino, la filino, la fianĉo kaj la amanto, kaj se mi ne preparas bone tiun ĉi renkontiĝon ni ĉiuj ruiniĝos en ĝi.

D.^a FRAN.—Vi estas prava. Sed, ne... Li estas kuraĝa kaj talenta, kaj li scios decidi tion kio estas plej bona. Kaj kiel vi avertos min? Memoru, tuj kiam li venos mi volas vidi lin.

RITA.—Estu trankvila. Mi lin venigos tien ĉi, kaj faros tiun tuseton sekan... ĉu vi komprenas min?

D.^a FRAN.—Jes, bone.

RITA.—Nu, tiam vi eliros, kun ia ajn preteksto. Mi restos sola kun la sinjorino. Mi parolados kun ŝi pri ĉiuj ŝiaj edzoj kaj pri ŝiaj bofratoj, kaj pri la episkopo, kiu mortis sur la maro... Krom tio, se estos tie don Diego...

D.^a FRAN.—Bone, iru, kaj tuj kiam li alvenos..

RITA.—En tiu sama momento.

D.^a FRAN.—Ne forgesu tusi.

RITA.—Ne timu.

D.^a FRAN.—Se vi scius kiel mi estas konsolita!

RITA.—Kvankam vi ne ĵuros, mi vin kredas.

D.^a FRAN.—Ĉu vi memoras kiam li diris, ke estis neeble, ke li forigu min el sia memoro, ke ne estas danĝeroj kiuj kontraŭstaros lin, nek malhelpoj, kiujn li ne detruos por mi?

RITA.—Jes, mi bone memoras.

D.^a FRAN.—Ho, nun vidu kiel li diris veron.
(*D.^a Francisca foriras en la ĉambbron de D.^a Irene; Rita, tra la centra pordo.*)

DUA AKTO

SCENO I

(Teatro malluma.)

D.^a FRAN. (*sola*).—Ankoraŭ neniŭ aperas... (*Ŝi alproksimiĝas al la centra pordo, kaj revenis.*)
 Kiom da malpacienco mi havas! Kaj diras mia patrino ke mi estas naivulino, ke mi nur pensas ludi kaj ridi, kaj ke mi ne scias tion kio estas amo... Jes, deksep jaroj, kaj ne plenaj ankoraŭ, sed mi scias bone kio estas amegi, kaj kiom da maltrankvileco kaj larmoj tio kostas.

SCENO II

D.^a Irene, D.^a Francisca.

D.^a IRE.—Sola kaj sen lumo vi lasis min tie.

D.^a FRAN.—Ĉar vi estis finanta vian leteron, patrino, kaj por ne distri vin mi venis tien ĉi, kie estas multe pli malvarmete.

D.^a IRE.—Sed tiu knabino, kie ŝi estas? kial ŝi

ne alportas kandelon? Pro la plej malgranda afero ŝi malfruas unu tutan jaron, kaj mi kiu havas karakteron kiel pulvon... (*Ŝi sidiĝas.*) Estu ĉio por Dio!... Kaj ankoraŭ ne venis don Diego?

D.^a FRAN.—Ŝajnas ke ne.

D.^a IRE.—Nu, memoru, filino mia, kion mi jam diris. Kaj atentu ke mi ne ŝatas diri dufoje aferon ian. Tiu ĉi sinjoro estas ofendita, kaj li havas grandan kaŭzon.

D.^a FRAN.—Bone; jes, sinjorino, mi ja scias. Ne min riproĉu plu.

D.^a IRE.—Tio ĉi ne estas riproĉi, filino; ĝi estas konsili. Tial ke vi ne havas ankoraŭ saĝecon por kompreni kia bonaĵo estas alveninta al nia pordo... Kaj aparte kiam mi estas kovrita de ŝuldoj, tiel ke mi ne scias kio estus fariĝinta via malfeliĉa patrino... ĉiam faletante kaj leviĝante... Kuracistoj, apoteko... Kaj tiu sovaĝulo, don Bruno (sed ĉar li mortis, Dio lin pardonu!) kiu igis min pagi po kvin kaj sep frankoj unu papereton da piloloj el asafetido kaj kolokintido... Konsideru ke tre malmultaj sukcesas fari edziniĝon kiel vian. Kvankam ni ne devas tian ŝancon al viaj meritoj nek al mia agemeco, sed al la preĝoj de viaj onklinoj kiuj estas piulinoj. Kion vi diras?

D.^a FRAN.—Mi, nenion, patrineto.

D.^a IRE.—Fi! vi neniam diras ion. Dio min helpu! Kiam mi parolas al vi pri tio, vi havas nenion por diri.

SCENO III

Rita (*eniras tra la centra pordo kun kandeloj kaj metas illin sur la tablon*) **D.^a Irene,**
D.^a Francisca.

D.^a IRE.—Nu, virino, mi kredis, ke vi ne venus ja tiun ĉi nokton.

RITA.—Sinjorino, mi malfruis ĉar oni devis eliri aĉeti kandelojn... Tial ke la fumo de la lampo faras al vi tiom da malbono!

D.^a IRE.—Certe, ĝi faras al mi grandegan malbonon, kun tiu ĉi kapdoloro kiun mi suferas... Mi fine deviĝis forigi la kanforajn bandaĵojn; ili neniel taŭgis por mi. La hostioj estas ŝajne pli bonaj... Atentu, lasu tie la kandelon kaj portu alian en mian ĉambron kaj fermu la kurtenojn por ke ĉio ne pleniĝu je kuloj.

RITA.—Tre bone. (*Ŝi prenas kandelon kaj ŝaj-nigas foriri.*)

D.^a FRAN. (*Flanken al Rita.*)—Ĉu li ne venis?

RITA.—Li venos.

D.^a IRE.—Aŭskultu, donu la leteron kiu kuŝas sur la tablo al servisto de l' gastejo, por ke li portu ĝin tuj al la posto. (*Foriras Rita en la ĉambron de D.^a Irene.*) Kaj vi, karulino, kion vi havas por vespermanĝi? Ĉar ni devas baldaŭ kuŝiĝi por ekiri frumatene.

D.^a FRAN.—Ĉar la monaĥinoj donis al mi iom por manĝeti posttagmeze...

D.^a IRE.—Malgraŭ tio... almenaŭ iom da supo por konforti la stomakon... (*Eniras Rita kun letero en la mano, kaj ĝis fino de la sceno ŝajnigas ekiri kaj revenas, laŭ monstro de la dialogo.*) Memoru, vi varmigu la buljonon kiun ni apartigis tagmeze kaj preparu por ni du tasojn da supo, kaj alportu ilin tuj kiam ili estos pretaj.

RITA.—Ĉu nenion plu?

D.^a IRE.—Ne, nenion... Ha! sed faru la supon bone varmigita.

RITA.—Jes, mi ja scias.

D.^a IRE.—Rita!

RITA.—Ankoraŭ! Kion vi ordonas?

D.^a IRE.—Memorigu bone la serviston, ke li tuj portu la leteron... Sed ne, pli bone estas... Mi ne volas ke li portu ĝin, ĉar ili estas tiel drinke-muloj ke neniu povas... Diru vi al Simono, ke mi diris ke li havu la bonecon meti ĝin en la poŝtkeston. Ĉu vi komprenas?

RITA.—Jes, sinjorino.

D.^a IRE.—Ha, aŭskultu!

RITA.—Ankoraŭ!

D.^a IRE.—Vere, tio ĉi ne urgas... sed tuj poste vi devas preni la turdon el tie kaj pendigi ĝin tie ĉi, por ke ĝi ne falu kaj vundiĝu... (*Foriras Rita tra la centra pordo.*) Kian malbonan nokton ĝi kaŭzis al mi! Imagu, do! La besto, dum la tuta, sankta

nokto, ne faris alion ol kantadi la *Gloria Patri* kaj ripetadi la preĝon pri la sankta mortkitelo. Tio estas, sendube, edifa... sed kiam oni deziras dormi...

SCENO IV

D.^a Irene, D.^a Francisca.

D.^a IRE.—Nu, kredeble don Diego renkontis iun sur la strato kaj pro tio li malfruas... Vere li estas sinjoro tre respektinda, tre akurata... Tiel bona Kristano! Tiel ĝentila! Tiel afabla! Kaj, kia grandanima kaj malavara li estas! Kompreneble ĉe viro riĉa kaj potenca... Kaj, kian hejmon li havas! Ĝi estas brila kiel oro; ĝi estas mirinda... Kia tolaĵejo! kia kuirejo! kaj kia manĝaĵejo plena je ĉio kion Dio donas! Sed ŝajnas, ke vi ne atentis kion mi diras.

D.^a FRAN.—Jes, sinjorino; mi bone aŭdas, sed mi ne volis interrompi vin.

D.^a IRE.—Tie vi estos, filino mia, kiel fiŝo en akvo. Se vi deziras birdetojn el la ĉielo vi havos ilin, ĉar li tiel amas vin, kaj li estas nobelo tiel respektata kaj religia... Sed, aŭskultu Francisca, efektive tio lacigas min ke vi ĉiam silentas kiam mi parolas pri tio... Vere, vi estas enuiga!

D.^a FRAN.—Ho! patrineto, ne koleriĝu.

D.^a IRE.—Kian kapricon vi havas! Ĉu vi pensas, ke mi ne scias de kie venas ĉio tio? Ĉu vi ne vidas,

ke mi bone konas la deziron kiu eniris vian pase-
ran kapon? Dio pardonu min!

D.^a FRAN.—Sed, kion vi scias do?

D.^a IRE.—Kiel? Ĉu vi kredas, ke vi povas trompi min? Ho! filino, mi estas ja neĵuna, mi scias multe kaj mi havas tro da sagaceco por ke vi povu trompi min.

D.^a FRAN.—(*Flanken.*) Mi perdiĝis.

D.^a IRE.—Ne kalkulante kun via patrino,—kvazaŭ vi ne havas patrinon. Mi certigas vin, ke se ne estus por tio ĉi, estus ja tute necese eltiri vin el la monaĥinejo. Kvankam mi estus devigata fari la vojiradon piede kaj sole, mi estus eltiranta vin el tie... Mirigas min la ideo de tiu ĉi knabino! Nur ĉar ŝi vivis iomete da tempo inter monaĥinoj ŝi kaptis la kapricon fariĝi monaĥino ŝi ankaŭ! Kion scias ŝi pri tio, kaj kion...? En ĉiuj statoj oni servas Dion Francinjo, sed la unua devo de filino obeema estas plaĉi sian patrinon, ami ŝin, akompani ŝin, kaj konsoli ŝin en ŝiaj kontraŭaĵoj... Sciu tiun, do, se vi ankaŭe ne sciis ĝin.

D.^a FRAN.—Estas vere, patrino. Sed mi neniam intencis forlasi vin.

D.^a IRE.—Ho, tio estas ke mi ne scias...

D.^a FRAN.—Ne, sinjorino, kredu min. Francinjo neniam disiĝos de sia patrino, nek donos al ŝi enuojn.

D.^a IRE.—Pripensu ke estu certa tio kion vi diras.

D.^a FRAN.—Jes, sinjorino, ĉar mi ne scias mensogi.

D.^a IRE.—Nu, flino, vi ja scias kion mi diras. Vi vidas kion vi perdas, kaj vi konos la malĝojon kiun vi donos al mi se vi ne kondutos dece... Ne forgesu tion.

D.^a FRAN.—(*Flanken.*) Ho, v

SCENO V

D. Diego (*eniras tra la centra pordo kaj lasas sur la tablo sian ĉapelon kaj bastonon*), **D.^a Irene,**
D.^a Francisca.

D.^a IRE.—Nu, kial tiel malfrue?

D. DIE.—Tuj kiam mi eliris, mi renkontis la rektoron de Malago kaj doktoron Padilla, kaj ĝis kiam ili plenigis min per ĉokolado kaj kukoj ili ne volis lasi min. (*Li sidiĝas apud D.^a Irene.*) Kaj nun, kiel vi fartas?

D.^a IRE.—Tre bone.

D. DIE.—Kaj D.^a Francinjo?

D.^a IRE.—D.^a Francinjo ĉiam rememorema pri siaj monaĥinoj. Mi ĵus diris al ŝi ke nun estas tempo ŝanĝi sistemon kaj pensi sole plaĉi sian patrinon kaj ŝin obei.

D. DIE.—Diablo! ĉu ŝi tiom rememoras...?

D.^a IRE.—Ĉu vi miras? Ĉe knabinoj... Ili ne

scias kion ili deziras, nek kion ili abomenas. En tia aĝo, tiel...

D. DIE.—Ne; iom post iom, tute ne. Precipe en tiu aĝo la pasioj estas pli fortaj kaj decidemaj ol en nia, kaj des pli neperfekta kaj malforta la saĝeco, ju pli perfortaj estas la agoj de l'koro. (*Li ekkaptas unu manon de D.^a Francisca kaj devigas ŝin sidiĝi apud si.*) Sed ĉu vere, D.^a Francisca, vi volonte reirus en la monaĥinejon?... Diru la veron.

D.^a IRE.—Sed ŝi ne...

D. DIE.—Permesu, sinjorino! permesu ke ŝi mem respondu.

D.^a FRAN.—Vi bone scias kion mi ĵus diris... Ne volu Dio ke mi kaŭzu al vi malĝojon.

D. DIE.—Sed tion vi diras tiel malgaje, kaj. .

D.^a IRE.—Tio estas komprenebla, sinjoro. Ĉu vi ne vidas...

D. DIE.—Silentu, pro Dio, D.^a Irene, kaj ne diru al mi tion, kio estas komprenebla. Kio estas komprenebla, tio estas ke la knabino estu plena je timo, kaj ne kuraĝu diri eĉ vorton kiu povas kontraŭstari tion, kion sia patrino volas ke ŝi diru... Sed se tio okazus, ho, ve! kia ridinda rolo estus mia.

D.^a FRAN.—Ne, sinjoro, tion mem kion diras via Moŝto, tion diras mi, la samon. Ĉar mi obeos ĉion, kion ŝi ordonos al mi.

D. DIE.—Ordoni, karulino mia! Ĉe tiuj ĉi aferoj tiel delikataj la gepatroj saĝaj ne ordonas. Ili inspiras, proponas, konsilas; jes, ili tion faras, ĉion

tion; sed ordoni! Kaj poste kiu forpelos la bedaŭrindajn rezultatojn de tio kion ili ordonis? Ĉar, kiel ofte ni vidas geedzojn malfeliĉajn, unuigojn monstrajn efektivigitajn nur ĉar la malsaĝa patro volis ordoni kiam li ne devis ordoni? Kiel ofte mizera virino trovas antaŭtempan morton en la palisaro de klaustro ĉar ŝia patrino aŭ ŝia onklino obstinis donaci al Dio ion kion Dio ne deziris. Holne; tio estas malprava. Sciu, D.^a Francinjo, ke mi ne estas unu el tiuj homoj kiuj kaŝas siajn difektojn. Mi scias ke nek mia vidiĝo nek mia aĝo estas decaj enamigi iun ajn; sed nek ankaŭ kredis mi ke estas neeble ke knabino saĝa kaj bone edukita povu ami min per tiu amo trankvila kaj konstanta kiu tiom similas amikecon, kiu sola povas doni feliĉecon en edza stato. Por ĝin ricevi mi ne serĉis fraŭlinon el tiuj, kiuj vivadas en honesta libereco... Honesta; ĉar mi ne kulpigas tion kio ne kontraŭstaras la praktikadon de virto. Sed, kiu estas ŝi, el ĉiuj, kiu ne havus jam inklinton al alia amanto pli ŝatindas ol mi? Kaj en Madrido! Pripensu, en ĉefurbo kiel Madrido!... Tiel pensante ŝajnis al mi, ke eble mi trovos ĉe vi kion mi deziris.

D.^a IRE.—Kaj vi povas kredi, sinjoro D. Diego, ke...

D. DIE. — Mi tuj finos, sinjorino; permesu ke mi finu. Mi bone komprenas, kara Francinjo, kian grandan influon havis sur vian animon la sanktaj kutimoj kiujn vi vidis uzadi en tiu malpeka rifuĝejo de la religio kaj la virto; sed se malgraŭ ĉio tio la fantazio hejtigita, cirkonstancoj neatenditaj, igis vin elekti personon pli indan, sciu ke mi ne-

nion volas perforte. Mi estas verdirema; mia koro kaj mia lango neniam kontraŭdiras unu la alian. Tion saman mi petas al vi, Francinjo, sincerecon. La amo kiun mi havas por vi ne devas igi vin malfeliĉa. Via patrino ne estas kapabla deziri ion nejustan, kaj ŝi scias tre bone ke neniu estas feliĉa per forto. Se vi ne trovas ĉe mi ecojn kiuj vin inklinas, se vi sentas alian ameton en via koro, kredu min, la plej malgranda sekreto kaŭzus al mi multegan bedaŭron.

D.^a IRE.—Ĉu mi povas paroli nun, sinjoro?

D. DIE.—Ŝi, ŝi devas paroli, kaj sen rememorigisto kaj sen tradukisto.

D.^a IRE.—Kiam mi tion ordonos...

D. DIE.—Nu, vi povas nun tion ordoni, ĉar estas ŝi, kiu devas respondi. Mi edziĝos kun ŝi; kun vi, ne.

D.^a IRE.—Mi kredas, sinjoro D. Diego, ke nek kun ŝi nek kun mi. Kian opinion havas vi pri ni? Prave diras ŝia baptopatro, kaj tre klare li skribis al mi antaŭ malmultaj tagoj, kiam mi avizis lin pri tiu ĉi fianĉiĝo. Ĉar, kvankam li ne revidis ŝin de la tago kiam li tenis ŝin en preĝejo, li amas ŝin multege, kaj al ĉiuj kiuj traveturas Burgon de Osma li demandas kiel ŝi fartas, kaj senĉese li sendas komplimentojn per la kondukisto.

D. DIE.—Bone, sinjorino, kion skribis la baptopatro? Aŭ, pli bone parolante, kian rilaton havas tio ĉio al la afero kiu nun okupas nin?

D.^a IRE.—Jes, sinjoro, ĝi havas rilaton; jes, si-

njoro. Kaj kvankam mi mem tion diras, mi certigas al vi ke eĉ pastro ia de Atocha neniam verkis leteron pli bonan ol tiu, kiun li sendis pri la edziniĝo de la knabino... Kaj li ne estas profesoro, nek abituriento, nek io simila, sed ordinara homo, kvazaŭ negrava, simpla burĝo, kiu havas mizeran oficon kie li apenaŭ perlaboras sufiĉon por manĝi... Sed li estas tre ruza, kaj scias ĉion, kaj havas mirindan facilecon paroladi kaj skribas laŭ ĝojiga stilo, preskaŭ la tuta letero estis verkita Latine,—ĉu vi aŭdas? kaj en ĝi li donis tre prudentajn konsilojn. Ŝajnas ke li perfekte divenis tion ĉi, kiu nun okazas al ni.

D. DIE.—Sed, sinjorino, nenio okazas afero ia kiu povas vin ofendi.

D.^a IRE.—Kial? Ĉu vi volas ke mi ne ofendiĝu aŭdante vin paroli pri mia filino laŭ maniero, kiu... Ŝi, kun aliaj amoj aŭ duboj!... Nu, se tiaj ekzistus... Dio pardonu min!... mi mortigus ŝin per batoj; ĉu vi scias? Respondu al li tuj, tial ke li volas, ke vi parolu kaj mi silentu. Rakontu al li kiom da amantoj vi lasis en Madrido, kiam vi estis dudekjara, kaj tiujn, kiujn vi havis en la monaĵinejo ĉe tiu sankta virino. Diru tion por ke li trankviliĝu, kaj...

D. DIE.—Mi, sinjorino, estas pli trankvila ol vi.

D.^a IRE.—Respondu al li.

D.^a FRAN.—Mi ne scias kion respondi. Vi estas tiel kolerigitaj.

D. DIE.—Ne, karulino; tio ĉi estas nur iom

klarigi tion, kion oni devas diri, sed koleri! neniel.
D.^a IRENE scias kiom mi estimas ŝin.

D.^a IRE.—Jes, sinjoro, mi tion scias, kaj mi estas tre dankema pro la favoroj, kiujn vi faris al ni... kaj precipe por tio...

D. DIE.—Neniu parolu pri danko; ĉio tio kion mi povas fari estas malmulta... Mi nur deziras ke D.^a Francinjo estu kontenta.

D.^a IRE.—Nu, ĉu ŝi ne tia estas? Respondu.

D.^a FRAN.—Jes, sinjoro, mi estas kontenta.

D. DIE.—Kaj ke la ŝanĝo de stato kiu alproksimiĝas ne kaŭzu al ŝi la plej malgrandan bedaŭron.

D.^a IRE.—Ne, sinjoro; tute kontraŭe. Edziĝo pli ŝatinda al ĉiuj ne estas imagebla.

D. DIE.—Sub tiu supozo mi povas certigi vin ke ŝi neniam havos kaŭzon penti. En nia hejmo ŝi vivos amata kaj adorata; kaj mi esperas ke per bonaĵoj mi meritos ŝian estimon kaj amikecon.

D.^a FRAN. Mi dankas vin, sinjoro D. Diego... Al orfulino malriĉa, senhelpa kiel mi!...

D. DIE.—Sed de ecoj tiel estimindaj, ke iĝi ŝin indigas je pli granda riĉeco.

D.^a IRE.—Venu tien ĉi, venu... Venu tien ĉi, filino mia!

D. FRAN.—Patrineto! (*D.^a Francisca leviĝas, ĉiukaŭprenas sian patrinon, kaj ili sin karesas reciproke.*)

D.^a IRE.—Cu vi vidas kiom mi amas vin?

D.^a FRAN.—Jes, sinjorino.

D.^a IRE.—Kaj kiom mi serĉas vian feliĉecon; ĉar mia sola celo estas vidi vin loĝigita antaŭ ol mi mortu.

D.^a FRAN.—Mi bone scias tion.

D.^a IRE.—Karulino mia! Ĉu vi estos bona?

D.^a FRAN.—Jes, sinjorino.

D.^a IRE.—Ho! vi ne scias kiom vin amas via patrino.

D.^a FRAN.—Sed, ĉu mi do ne amas vin?

D. DIE.—Ni foriru, ni foriru de tie ĉi. (*Leviĝas D. Diego, kaj poste D.^a Irene.*) Iu povas alveni kaj trovi nin tri plorantajn kiel tri infanoj.

D.^a IRE.—Jes; vi parolas prave. (*Ili du iras en la ĉambiron de D.^a Irene. D.^a Francisca iras poste; kaj Rita, kiu eniras tra la centra pordo, ŝin haltigas.*)

SCENO VI

Rita, D.^a Francisca.

RITA.—Fraŭlino... He! Silenton! Fraŭlino...

D.^a FRAN.—Kion vi volas?

RITA.—Li venis.

D.^a FRAN.—Kiel?

RITA.—Li ĵus alvenis. Mi donis al li kareson,—

petante al vi pardonon—kaj nun li supreniras la ŝtuparon.

D.^a FRAN.—Ho, Dio!... Kion mi devas fari?

RITA.—Belega demando! Nun estas plej grave ne perdi tempon per amindumaj sensencaĵoj... Al la afero... kaj prudente. Kaj memoru ke en la loko, kie ni trovas nin la interparolado ne povas esti tre longa... Jen li estas.

D.^a FRAN.—Jes; estas li.

RITA.—Mi foriras vigli tiujn personojn... Kuraĝon, fraŭ ino, kaj decidecon. (*Ŝi eniras la ĉambron de D.^a Irene.*)

D.^a FRAN.—Ne, ne, ĉar mi ankaŭ... Sed ne konvenas...

SCENO VII

D. Carlos (*eniras tra la centra pordo*),
D.^a Francisca.

D. CAR.—Francinjo!... Ĉarmulino mia!... Jen mi estas. Kiel vi fartas, belulino? kiel?

D.^a FRAN.—Bonvenon al vi.

D. CAR.—Kial tiel malĝoja? Ĉu ne meritas mia alveno pli da ĝojoj?

D.^a FRAN.—Estas vere. Sed ĵus okazis al mi aferoj kiuj frenezigas min. Ĉu vi scias?... Jes, vi ja scias. Post kiam mi skribis tiun leteron, oni veni-

gis min... Morgaŭ Madridon... Tie estas mia patrino.

D. CAR.—Kie?

D.^a FRAN.—Tie, en tiu ĉambro. (*Montrante la ĉambro de D.^a Irene.*)

D. CAR.—Sola?

D.^a FRAN.—Ne, sinjoro.

D. CAR.—Ĉu kun la fianĉoedzigota? (*Li alproksimiĝas al la ĉambro de D.^a Irene, haltas kaj revenas.*) Plibone... Sed, ĉu ne estas alia kun ŝi?

D.^a FRAN.—Neniu plu... Kion vi pensas fari?

D. CAR.—Se mi forlasus min al mia pasio kaj al tio kion inspiras al mi tiuj okuloj, bravegaĵon... Sed tempo restas... Li an'ŝaŭ povas esti homo de honoro, kaj ne estas juste insulti lin, tial ke li amas virinon tiel indan je amo. Mi ne konas vian patrinon... ho! nun nenio estas farebla... Via famo postulas la unuan prizorgon.

D.^a FRAN.—Estas granda ŝia obstino ke mi edziniĝu kun li.

D. CAR.—Tio ne malhelpas.

D.^a FRAN.—Ŝi volas ke tiu ĉi edziĝo efektiviĝu tuj kiam ni alvenos Madridon.

D. CAR.—Kia? Ne, neniam.

D.^a FRAN.—Ambaŭ interkonsentis kaj diras...

D. CAR.—Bone... Ili diros... Sed ne estas eble...

D.^a FRAN.—Mia patrino senĉese parolas al mi nur pri tio. Ŝi minacas min; ŝi plenigis min je timo... Li ankaŭ urĝas min, promesas al mi tiom da bonaĵoj, mi...

D. CAR.—Kaj vi, kian esperon donas vi al li? Ĉu vi promesis ami lin multe?

D.^a FRAN.—Sendankemulo!... Ĉu vi ne scias ke?... Sendankemulo!

D. CAR.—Jes, jes, mi scias, Francinjo... Mi estas via unua amo.

D.^a FRAN.—Kaj mia lasta.

D. CAR.—Kaj mi perdos la vivon antaŭ ol forlasi la lokon kiun mi havas en tiu koro... Ĝi estas tute mia... Ĉu ne?

D.^a FRAN.—Kies do povas ĝi esti?

D. CAR.—Ĉarmulino! Kia dolĉa espero vivigas min!... Unu sola vorto el tiu buŝo certigas min... Ĝi kuraĝigas min por ĉio... Resume, jen mi estas. Ĉu vi venigis min por ke mi defendu vin, liberigu vin, plenumu devon mil kaj mil foje promesitan? Nu, ĝuste pro tio mi venis. Se vi morgaŭ iros Madridon, mi ankaŭ tien iros. Via patrino scios kiu mi estas. Tie mi povas kalkuli kun la favoro de ia maljunulo bonega kaj estimata, kiun, pli bone ol onklo, mi devas nomi amiko kaj patro. Li ne havas parencon pli proksiman aŭ pli amatan ol mi; li estas riĉa, kaj se la bonaĵoj de riĉeco havas por vi allogon ian, tiu ĉi cirkonstanco aldonos feliĉaĵojn al nia unuiĝo.

D.^a FRAN.—Kaj kian valoron havas por mi la tutaj riĉaĵoj de la mondo?

D. CAR.—Mi ja scias. Ambicio ne povas agitⁱ spiriton tiel puran.

D.^a FRAN.—Ami kaj esti amata... Nek deziras mi pli, nek konas mi pli grandan feliĉon.

D. CAR.—Ne ekzistas alia... Sed vi devas trankviliĝi kaj atendi ĝis kiam la ŝanco ŝanĝos nian nunan bedaŭron por daŭra feliĉeco.

D.^a FRAN.—Sed, kiel ni agos por ke mia bona patrino ne ricevu malĝojon?... Ŝi amas min tiom!... Mi ĵus diris al ŝi ke mi ne malĝojigos ŝin, ke neniam mi forlasos ŝin, ke ĉiam mi estos obeema kaj bona .. Kaj ŝi karesis min tiel kortuŝita! Ŝi restis tiel konsolita pro la malmulto kiun mi sukcesis eldiri... Mi ne scias, mi ne scias, kian vojon vi trovos por ke ni ne enfalu en tiujn ĉi danĝerojn.

D. CAR.—Mi ĝin serĉos... Ĉu vi ne konfidos je mi?

D.^a FRAN.—Nepre, mi konfidas. Ĉu vi kredas ke mi estus viva se tiu espero ne vivigus min? Sola kaj nekonata de ĉiuj, kion mi povus fari? Se vi ne estus veninta, mia melankolio estus mortiginta min, ĉar mi ne havas iun al kiu mi turnus min, nek al kiu mi povus komuniki ĝian kaŭzon. Sed vi kondukis kiel nobelo kaj amanto, kaj per via alveno vi ĵus donis al mi la plej bonan pruvon de via granda amo. (*Kortuŝita ŝi ekploras.*)

D. CAR.—Kia ploro!... Kiel ĝi konvinkas!... jes, Francinjo, mi sola sufiĉas por defendi vin kontraŭ

ĉiuj kiu subpremos vin. Kiu kuraĝos kontraŭstari amanton akceptitan? Nenion timu.

D.^a FRAN.—Ĉu vere?

D. CAR.—Nenion... La amo unuigis niajn korojn per fortaj ligiloj, kaj nur la morto povas ilin diskunigi.

SCENO VIII

Rita, D. Carlos, D.^a Francisca.

RITA.—Fraŭlino, eniru, eniru. Via patrino demandas pri vi. Mi iras alporti la vespermanĝon kaj poste ili tuj kuŝiĝos. Kaj vi, sinjoro amindumanto, vi povas disponi je vi mem.

D. CAR.—Jes; ne konvenas vekti suspekton. Mi ne bezonas diri plu.

D.^a FRAN.—Nek mi ankaŭ.

D. CAR.—Ĝis morgaŭ, per la taglumo ni vidos tiun ĉi faman konkuranton.

RITA.—Sinjoron tre respektindan, tre riĉan, tre prudentan, kiu portas longan jakon kaj blankan ĉemizon, kaj li havas sesdek tutajn jarojn sub sia peruko. (*Ŝi foriras tra la centra pordo.*)

D.^a FRAN.—Ĝis morgaŭ.

D. CAR.—Adiaŭ, Francinjo.

D.^a FRAN.—Iru kuŝiĝi kaj ripozi.

D. CAR.—Ripozi kun ĵaluzo!

D.^a FRAN.—Pri kiu?

D. CAR.—Bonan nokton. Dormu bone, Francinjo.

D.^a FRAN.—Dormi kun amo!

D. CAR.—Adiaŭ, ĉarmulino.

D.^a FRAN.—Adiaŭ (*Ŝi eniras la ĉambron de D.^a Inés.*)

SCENO IX

D. Carlos (*promenante maltrankvile*), **Kalamoĉo**.

D. CAR.—Forpreni ŝin de mi?... Ne, li estu kiu ajn, li ne forprenos ŝin de mi .. Nek estos ŝia patrino tiel malsaĝa, tiel obstina pro tiu edziĝo, kiam ŝi ekscios ke ŝia filino malamas ĝin... kaj ke mi min intermetas... Sesdek jaroj!... Ĝuste li devas esti tre riĉa... La mono!... Malbenita estu ĝi, kiu kreas tiom da malpaco!

KAL. (*enirante tra la centra pordo*).—Nu, sinjoro, ni havas duonon da kaprido rostita kaj... almenaŭ ĝi ŝajnas kaprido... Ni havas belegan salaton de kresoj sen miksaĵo ia de malbonaj herboj, bone lavitan, sekigitan kaj pretigitan per tiuj ĉi pekaj manoj miaj, tiel ke ne estas eble havi ion pli bongustan. Blankan panon, kaj trijaran vinon... sekve, se ni devas manĝi kaj dormi, mi opinias, ke...

D. CAR.—Bone. Kie ni manĝos?

KAL.—Malsupre. Tie mi pretigis tablon malarĝan, mizeran, kiu ŝajnas plibone stablon de forĝisto.

RITA.—(*Enirante tra la centra pordo kun kelkaj teleroj, tasoj, kuleroj kaj tablotuko*). Kiu petas supon?

D. CAR.—Profiton al vi!

KAL.—Se estas ia belulineto kiu volas manĝi kapridon rostitan, ŝi levu fingron.

RITA.—La belulineto jam manĝis duonon da telerego da hakaĵo... Sed mi dankas, sinjoro militisto. (*Ŝi eniras en la ĉambiron de D.^a Irene*).

KAL.—Dankema vi plaĉas al mi, adorata.

D. CAR.—Nu, ni iru.

KAL.—Ho! ho! ho! (*Kalamoĉo ekiras al la centra pordo kaj revenas; li alproksimiĝas al D. Carlos, kaj ili interparolas sekrete ĝis fino de la sceno, kiam Kalamoĉo paŝas antaŭen kaj salutas Simonon*). He! silentu; mi diras...

D. CAR.—Kion?

KAL.—Ĉu vi ne vidas tiun, kiu venas tien ĉi?

D. CAR.—Ĉu estas Simon?

KAL.—Li mem... Sed kiel diable li...

D. CAR.—Kaj kion ni faros?

KAL.—Mi ne scias. Demandi, mensogi kaj... Ĉu vi donas permeson por...?

D. CAR.—Jes, mensogu tiom kiom vi volos... Kial estas veninta tien ĉi tiu homo?

SCENO X

Simono (*eniras tra la centra pordo*), **D. Carlos,**
Kalamoĉo.

KAL.—Simono, ĉu estas vi?

SIM.—Saluton, Kalamoĉo. Kiel vi fartas?

KAL.—Bonege.

SIM.—Kiom mi ĝojas pro...

D. CAR.—Nu, ĉu vi en Alcalá? Kio nova okazas do?

SIM.—Ho! ĉu vi, sinjoro, estis tie? Diablo!

D. CAR.—Kaj mia onklo?

SIM.—Tre sana.

KAL.—Sed, ĉu li restis en Madrido, aŭ...

SIM.—Kiu estus dirinta al mi...? Kiel strange! Neniam pensis mi, ke... Kaj vi, ĉian fojon pli bela... Do, vi venis vidi vian onklon, ĉu ne?

KAL.—Sendube vi alportas depeŝon de via mastro?

SIM.—Kaj kiel varmega mi estis? kaj kia polvo sur la vojo! Hu!

KAL.—Verŝajne vi venis kolekti monon, ĉu ne?

D. CAR.—Kredeble. Ĉar mia onklo havas tiun bieneton en Ajalviro... Ĉu vi ne venis por tio?

SIM.—Kaj kia fripono rezultas la administranto!

Neniam mi vidis en la tuta kamparo laboriston pli ruzan aŭ pli disputeman. Nu, ĉu vi venis de Zaragozo?

D. CAR.—Nu, imagu vi...

SIM.—Aŭ ĉu vi tien iras?

D. CAR.—Kien?

SIM.—Zaragozon. Ĉu ne estas tie la regimento?

KAL.—Sed, amiko, ni foriris la pasintan someron de Madrido. Ĉu ni ne devas esti vojaĝintaj pli ol kelkaj mejloj?

SIM.—Kion mi scias? Iuj vojaĝas poŝte kaj estas pli ol kvar monatoj sur la vojo. Ĝi devas esti malbonega vojo.

KAL. (*flanken, sin apartigante de Simono*).—Malbenita vi estu, kaj via vojo, kaj la friponino kiu naskis vin!

D. CAR.—Sed, ankoraŭ vi ne diris, ĉu mia onklo estas en Madrido aŭ en Alcalá, nek kial vi venis, nek...

SIM.—Vi estas prava... Mi tuj rakontos... Bone, do... Nu, la mastro diris...

SCENO XI

D. Diego, D. Carlos, Simono, Kalamoĉo.

D. DIE. (*parolante interne*).—Ne, ne estas necese; ĉar estas lumo tie ĉi. Bonan nokton, Rita. (*D. Carlos ŝanceliĝas, kaj apartigas sin al la fundo de l' teatro.*)

D. CAR.—Mia onklo!

D. DIE.—Simono! (*Eliras D. Diego el la ĉambro de D.^a Irene, sin direktante al sia propra; li ekvidas D. Carlos kaj alproksimiĝas al li. Simono prezentas lumon kaj tuj lasas la kandelon sur la tablon.*)

SIM.—Jen mi estas, sinjoro.

D. CAR.—Ĉio perdiĝis.

D. DIE.—Nu... sed, kiu estas tiu?

SIM.—Amiko via, sinjoro.

D. CAR.—Mi mortas.

D. DIE.—Kial amiko? Kiel? Alportu tiun lumon.

D. CAR.—Onklo! (*Li volas kisi la manon de D. Diego, kiu kolere apartigas lin.*)

D. DIE.—For de tie ĉi!

D. CAR.—Sinjoro!

D. DIE.—For! Mi ne scias kial mi ne... Kion vi faras tie ĉi?

D. CAR.—Se vi ekkoleras kaj...

D. DIE.—Kion vi faras tie ĉi?

D. CAR.—Mia malfeliĉo venigis min.

D. DIE.—Ĉiam kaŭzante al mi enuon, ĉiam. Sed... (*alproksimiĝante al D. Carlos*), kion vi diras? Ĉu vere vi havas malfeliĉon?... Diru do, kio okazis? Kial estas vi tie ĉi?

KAL.—Tial ke li respektegas vin kaj li tre amas vin, kaj...

D. DIE.—Al vi mi nenion demandas. Kial vi forlasis Zaragozon sen mia permeso? Kial vi timas ekvidante min? Ion vi faris; jes, certe, vi faris ian sensencaĵon, kiu kostos la vivon al via malfeliĉa onklo.

D. CAR.—Ne, sinjoro, ĉar mi neniam forgesos la principojn de veremeco kaj prudento, kiujn vi tiel ofte inspiris al mi.

D. DIE.—Kial vi venis, do? Ĉu estas duelo? Ĉu estas ŝuldoj? Ĉu estas ia malpaco kun viaj ĉefoj? Liberigu min de tiu dubo, Carlos... Filo mia, senigu min je tiu malkvieto.

KAL.—Nu, tio ĉio estas nur ke...

D. DIE.—Mi jam diris ke vi silentu... Venu ĉi tien. (*Ekkaptante unu manon de D. Carlos, li apartigas sin kun li en angulon de l' teatro kaj mallaŭte parolas kun li.*) Diru al mi kio okazas?

D. CAR.—Malsaĝaĵo, manko de obeo al vi. Veni Madridon sen via antaŭa permeso... Mi multe pentas, ĉar vi tiel ĉagreniĝis ekvidinte min.

D. DIE.—Kaj krom tio, kio okazas?

D. CAR.—Nenio, sinjoro.

D. DIE.—Sed kia malfeliĉo estas tiu pri kiu vi parolis?

D. CAR.—Nenia. Renkonti vin en tiu ĉi loko... kaj tiom ĉagreni vin kiam mi esperis surprizi vin en Madrido, estadi ĉe vi kelkajn semajnojn, kaj reveni kontente tial ke mi vidis vin.

D. DIE.—Ĉu ne estas pli ol tio?

D. CAR.—Ne, sinjoro.

D. DIE.—Pripensu bone.

D. CAR.—Ne, sinjoro. Por tio mi venis. Nenio pli estas.

D. DIE.—Sed ne diru al mi... Estas neeble ke tiaj forkuradoj... Ne, sinjoro... Kiu do povus konsenti, ke oficiro foriru kiam li havas tiun kapricon, kaj tiamaniere forlasu siajn standardojn?... Ĉar se tiaj ekzemploj ofte ripetigus, adiaŭ, disciplino milita... Resume, tio ne povas esti.

D. CAR.—Konsideru, sinjoro, ke ni estas en paca tempo: ke en Zaragozo ne estas bezone deĵori tiel vigle, kiel en aliaj garnizonoj, kie oni ne permesas ripozi la militistaron... kaj fine, vi povas supozi, ke mia vojaĝo havas aprobon kaj permeson de miaj estroj; ke mi ankaŭ zorgas pri mia bona famo, kaj ke kiam mi foriris mi estis certa, ke mi ne estas necesa tie.

D. DIE.—Oficiro estas ĉiam necesa por siaj soldatoj. La reĝo havas lin tie por ke li instruu ilin, protektu ilin kaj donu al ili ekzemplon de disciplino, de kuraĝo kaj virto.

D. CAR.—Vi estas prava; sed mi jam diris la kaŭzojn...

D. DIE.—Ĉiuj tiuj kaŭzoj nenion valoras. Kial vi eksentis tian deziron vidi vian onklon? Tio kion volas via Moŝta onklo ne estas vin vidi ĉiusemajne, sed scii ke vi estas homo prudenta kaj ke vi plenumas viajn devojn. Tio estas kion li volas... Sed... *(Li laŭtigas la voĉon kaj promenas maltrankvile),*

mi aranĝos tiel, ke tiaj petolaĵoj ne ripetiĝos. Kion vi devas nun fari, tio estas ke vi tuj foriru.

D. CAR.—Sinjoro, se...

D. DIE.—Nepre, kaj tuj. Vi ne povas dormi tie ĉi.

KAL.—Sed la ĉevaloj ne povas plu kuri, nek sin movi.

D. DIE.—Forportu ilin do (*al Kalamoĉo*), kun la valizoj al la gastejo ekster muroj. Vi (*al don Carlos*), ne dormos tie ĉi.

Iru (*al Kalamoĉo*), vi, fripono, rapidu. Ĉio suben. Pagu la kalkulon, selu la ĉevalojn kaj marŝu... Helpu lin, (*al Simono*). Kiom da mono vi havas?

SIM.—Mi havas ĉirkaŭ kvar aŭ ses uncojn. (*Li prenas kelkajn monerojn el monujo kaj donas ilin al D. Diego.*)

D. DIE.—Donu al mi... Nu, kion vi faras? Ĉu mi ne diris ke tuj? Flugu. Kaj vi (*al Simono*), iru kun li, helpu lin kaj ne revenu ĝis kiam ili estos foririntaj. (*La du servistoj eniras la ĉambron de D. Carlos.*)

SCENO XII

D. Diego, D. Carlos.

D. DIE.—Prenu. (*Li donas al li la monon.*) Tio ĉi sufiĉas por la vojaĝo. Kiam mi tion ordonas, mi bone scias kion mi faras. Ĉu vi ne scias, ke estas

ĉio por via bono, kaj ke via alveno tien ĉi estas malsaĝaĵo? Vi ne devas malĝoji pro tio, nek kredi ke estas manko je amo... Vi ja scias ke mi ĉiam amis vin, kaj se vi kondutos konvene mi estos via amiko, kiel mi ĉiam estis.

D. CAR.—Mi ja scias.

D. DIE.—Bone, do, obeu kion mi ordonis.

D. CAR.—Mi nepre tion faros.

D. DIE.—Al la gastejo ekster muroj. (*Al la du servistoj kiuj eliras el la ĉambro de D. Carlos kun liaj pakajoj, kaj foriras tra la centra pordo*). Tie vi povos dormi dum la ĉevaloj manĝos kaj ripozos, kaj ne revenu tien ĉi sub ia ajn preteksto, nek returnen iru en la urbon. . memoru! kaj je la tria aŭ la kvara, marŝu. Ne forgesu, ĉar mi ekscios je kiu horo vi foriris. Ĉu vi komprenas?

D. CAR.—Jes, sinjoro.

D. DIE.—Atentu ke vi tion faros.

D. CAR.—Jes, sinjoro, mi faros kiel vi ordonas.

D. DIE.—Bone, adiaŭ. Ĉion mi pardonas al vi. Dio estu kun vi... Kaj mi ankaŭ ekscios kiam vi estos alveninta Zaragozon. Ne imagu, ke mi nescias kion vi faris la lastan fojon.

D. CAR.—Kion, do, mi faris?

D. DIE.—Ĉu mi ne diris, ke mi scias kaj ke mi pardonas? Kion pli vi volas? Ne estas nun necese pritrakti tion. Foriru.

D. CAR.—Restu kun Dio. (*Li kvazaŭ foriras kaj revenas.*)

D. DIE.—Ĉu vi ne kisas la manon de via onklo?

D. CAR.—Mi ne kuraĝis. (*Li kisas la manon de D. Diego kaj ili ĉirkaŭprenas sin.*)

D. DIE.—Ĉirkaŭprenu min; eble ni ne revidos nin.

D. CAR.—Kion vi diras? Tion ne permesu Dio!

D. DIE.—Kiu scias, filo mia? Ĉu vi havas ŝulpojn? Ĉu vi bezonas ion?

D. CAR.—Ne, sinjoro. Nuntempe ne.

D. DIE.—Strange, ĉar vi estas ĉiam malŝparema. Ĉar vi kalkulas kun la monujo de via onklo... Bone, do, mi skribos al S.^{ro} Aznar, ke li donu al vi cent doblonojn por mia konto. Kaj atentu pri la maniero elspezi ilin. Ĉu vi kartludas?

D. CAR.—Ne, sinjoro, neniam je mia vivo.

D. DIE.—Atentu pri tio. Nu, bonan vojaĝon. Kaj ne trovarmigu vin; tagveturoj mezegrandaj kaj ne pli... Ĉu vi foriras kontente?

D. CAR.—Ne, sinjoro, ĉar vi amas min multe vi kovras min per bonfaraĵoj kaj mi pagas vin malbone.

D. DIE.—Ni ne parolu plu pri la pasinto... Adiaŭ.

D. CAR.—Ĉu vi restas kolerigita de mi?

D. DIE.—Ne, ne, vere. Mi enuiĝis iom, sed tio ja pasis. (*Metante siajn du manojn sur la ŝultrojn de D. Carlos.*) Kondutu kiel saĝulo.

D. CAR.—Ne dubu pri tio.

D. DIE.—Kiel honorinda oficiro.

D. CAR.—Mi tion promesas.

D. DIE.—Adiaŭ, Carlos. (*Ili ĉirkaŭprenas sin.*)

D. CAR.—(*Aparte, forirante tra la centra por-do.*) Kaj mi forlasas ŝin! Mi perdas ŝin por ĉiam!

SCENO XIII

D. Diego.

Sufiĉe bone tio aranĝiĝis... Poste li ekscios ĝin, feliĉe... Sed tion skribi al li ne estas same kiel.. Jam farita, ne estas grave... Li, ĉiam tiel respekta por sia onklo!... Li estas el oro! (*Li forviŝas siajn larmojn, prenas kandelon, kaj eniras sian ĉambro. La teatro restas malluma kaj sola dum mallonga tempo.*)

SCENO XIV

D.^a Francisca, Rita

(*Ili eliras el la ĉambro de D.^a Irene. Rita portas kandelon kaj metas ĝin sur la tablon.*)

RITA.—Tie ĉi estas granda silento.

D.^a FRAN.—Ili devas esti jam kuŝiĝintaj... Kredeble ili estas tre lacaj.

RITA.—Ĝuste.

D.^a FRAN.—Veturado tiel longa!

RITA.—Devigita de amo, fraŭlino.

D.^a FRAN.—Jes, vi prave parolas: amo... Kaj mi mem, kion mi ne farus por li?

RITA.—Sed tiu ĉi ne estos la lasta mirindaĵo. Kiam ni alvenos Madridon, tiam ni vere vidos. Tiu malfeliĉulo D. Diego, kian ĉagrenegon li ricevos! Kaj aliparte li estas sinjoro tiel bona, ke estas domaĝe...

D.^a FRAN.—Nu, ĝuste de tio devenas ĉio. Se li estus homo malestiminda, mia patrino ne estus akceptinta lian peton, nek mi estus devigata kaŝi mian enuon. Sed la afero jam ŝanĝiĝis, Rita. Don Felix venis kaj mi nun timas neniun. Estante mia sorto regata de li, mi konsideras min la plej feliĉa el ĉiuj virinoj.

RITA.—Ha! okaze mi memoras... Kaj ŝi tiel rekomendis al mi... Estas videble ke pro tiu ĉi amindumado mia spirito estas... Mi tuj alportos ĝin... (*Ŝi turnas sin al la ĉambro de D. Irene.*)

D.^a FRAN.—Kien vi iras?

RITA.—Serĉi la turdon, ĉar mi preskaŭ forĝesis retiri ĝin el tie.

D.^a FRAN.—Jes, alportu ĝin; ke ĝi ne komencu preĝadi kiel hieraŭ nokte... Oni lasis ĝin apud la fenestro.. Sed zorgeme, ne veku la patrinon.

RITA.—Jes; aŭskultu la bruon de ĉevaloj kiuj paŝas tie malsupre. Ĝis alveno al nia strato de la Lupo, numero 7, dua, etaĝo estas neutile pensi

pri dormo... Kaj tiu malbenita pordego kiu knaras tiel...

D.^a FRAN.—Vi povas preni la kandelon.

RITA.—Ne estas necese; mi scias kie ĝi troviĝas. (*Ŝi foriras en la ĉambro de D.^a Irene.*)

SCENO XV

Simono (*eniras tra la centra pordo*),
D.^a Francisca.

D.^a FRAN.—Mi kredis ke vi estas kuŝiĝintaj.

SIM.—La mastro sendube tion faris, sed mi ankoraŭ ne scias kie mi kuŝiĝos... kaj mi estas tiel dormema.

D.^a FRAN.—Kiaj personoj ĵus alvenis?

SIM.—Neniu. Estas iuj, kiuj estis tie ĉi kaj ili ĵus foriris.

D.^a FRAN.—La kondukistoj?

SIM.—Ne, fraŭlino. Oficiro kun servisto, kiuj iras Zaragozon, laŭ oni diras.

D.^a FRAN.—Kiuj, diras vi, ili estas?

SIM.—La subkolonelo kun sia servisto.

D.^a FRAN.—Kaj ili estis tie ĉi?

SIM.—Jes, fraŭlino, tie en tiu ĉambro.

D.^a FRAN.—Mi ne vidis ilin.

SIM.—Sajnas ke ili alvenis hodiaŭ post-tagmeze... Kredeble ili jam finis sian aferon... Nu, ili foriris... Bonan nokton, fraŭlino. (*Li eniras la ĉambron de D. Diego.*)

SCENO XVI

Rita, D.^a Francisca.

D.^a FRAN.—Ho, Dio mia de mia spirito! Kio estas tio ĉi? Mi ne povas stari surpiede... Malfeliĉulino! (*Ŝi sidiĝas sur seĝon apud la tablo.*)

RITA.—Fraŭlino, mi alvenas mortante. (*Ŝi kunportas la kaĝon de la turdo, kaj metas ĝin sur la tablon, malfermas la pordon de la ĉambro de don Carlos, kaj revenas.*)

D.^a FRAN.—Ho, estas certe! Ĉu vi ankaŭ scias?

RITA.—Lasu min; mi ankoraŭ ne kredas, kion mi vidis... Tie ĉi estas neniu... nek valizoj, nek vestoj, nek... sed kiel li povis trompi min?... Mi mem vidis ilin foritantajn.

D.^a FRAN.—Ĉu estis ili?

RITA.—Jes, fraŭlino; ili du.

D.^a FRAN.—Sed ĉu ili forlasis la urbon?

RITA.—Mi viglis ilin ĝis kiam ili trairis la Pordegon de Martiroj. Ĝi estas tre proksima.

D.^a FRAN.—Kaj ĉu tiu estas la vojo al Aragono?

RITA.—Tiu estas.

D.^a FRAN.—Malinda! Malindulo!

RITA.—Fraŭlino!

D.^a FRAN.—Kiel ofendis vin tiu ĉi malfeliĉulino?

RITA.—Mi estas tute tremante... Sed... Tio estas nekomprenebla. Mi ne povas diveni la kaŭzojn de tia ago.

D.^a FRAN.—Ĉu mi ne amis lin pli, ol mian vivon? Ĉu li ne vidis min freneza pro amo?

RITA.—Mi ne scias kion diri pripensante agon tiel hontan.

D.^a FRAN.—Kion vi povas diri? Ke li neniam amis min, nek estas viro honorinda. Kaj li venis por tio! Min trompi, min forlasi tiamaniere! (*Ŝi levigas, kaj Rita subtenas ŝin.*)

RITA.—Pensi ke lia alveno havis alian celon ne ŝajnas al mi nature... Ĵaluzo... Kial povas li esti ĵaluza? Kaj tio mem devis enamigi lin ankoraŭ pli. Li ne estas timemulo kaj estas neutile diri, ke li timis sian konkuranton.

D.^a FRAN.—Vi laciĝas vane. Diru ke li estas perfidulo, diru ke li estas monstro de krueleco, kaj vi ĉion diros.

RITA.—Ni foriru el tie ĉi, ĉar iu povas alveni.

D.^a FRAN.—Jes, ni foriru... Iru ni ploregi... Kaj en kia situacio li lasas min! Sed ĉu vi vidas kian triponon?

RITA.—Jes, fraŭlino, mi ja konas lin.

D.^a FRAN.—Kiel bone li sciis ŝajnigi!... Kaj kun

kiu? Kun mi. Sed ĉu mi meritis, ke oni tiel honte trompu min? Ĉu meritis mia amo tiun rekompencan? Dio de mia vivo! Kia estas mia krimo, kia ĝi estas? (*Rita prenas la kandelon, kaj ili du iras en la ĉambron de D.^a Francisca.*)

TRIA AKTO

(Teatro malluma. Sur la tablo estas kandelingo kun kandelo estingita, kaj la kaĝo de l' tordo. Simono dormas etendita sur benko. D. Diego eliras el sia ĉambro finante sin vesti per nokta surtuto.)

SCENO I

D. Diego, Simono.

D. DIE.—Tie ĉi almenaŭ se mi ne dormos mi ne fluidiĝos. Ho, fi! dormoĉambro kiel tiu ne... Kiel ronkas tiu! Ni respektu lian dormadon ĝis tagiĝo, kiu ja baldaŭ aperos... *(Simono vekigās, kaj ekvidante D. Diegon, li leviĝas.)* Kio okazas. Atentu, homo, ne falu!

SIM.—Kio? Ĉu vi estis tie, sinjoro?

D. DIE.—Jes; mi tien ĉi eliris, ĉar tie estas neeble resti.

SIM.—Nu, mi almenaŭ, kvankam la lito estas malmola, mi dormis kiel imperiestro.

D. DIE.—Malbona komparo! Diru ke vi dormis kiel malriĉulo kiu ne havas monon, nek ambiciojn, nek riproĉojn de konscienco.

SIM.—Efektive, vi estas prava. Kaj nun kioma horo estas?

D. DIE.—Antaŭ nemulte sonis la turhorloĝo de Sankt' Justo kaj se mi ne eraras estis la tria.

SIM.—Ha! niaj kavaliroj do estas jam rajdantaj sur la vojo kaj saltigantaj fajrerojn. *toha to a...*

D. DIE.—Jes, kredeble ili jam foriris... Li tion promesis kaj mi esperas, ke li ĝin plenumos.

SIM.—Sed vi devis vidi kiel malgaje li foriris, kaj kiel malĝoje.

D. DIE.—Estis necese.

SIM.—Mi ja scias.

D. DIE.—Ĉu vi vidis kian malĝustatempan alvenon?

SIM.—Estas vere... Sen via permeso, sen averto, sen urĝa kaŭzo. Vere li malbone agis... Kvan-kam, spite ĉio, li havas meritojn sufiĉajn por ke oni pardonu al li tiun eraron... Mi volas diri... Ŝajnas al mi ke la puno ne estos pli granda... Ĉu ne?

D. DIE.—Ne, kial? Estas nur afero devigi lin returni... Vi ja komprenas en kiaj kondiĉoj li kaptis min. Mi ja certigas vin, ke kiam li foriris mi havis tian malĝojon en mia koro... (*Sonas malproksime tri ekbatoj de manoj, kaj malmulte poste oni aŭdas ludeti muzikilon.*) Kio sonis?

SIM.—Mi ne scias. Homoj pasantaj sur la strato, Kredeble kamparanoj.

D. DIE.—Silentu!

SIM.—Ja, muzikon ni havos, verŝajne.

D. DIE.—Jes; se ili ludos bone.

SIM.—Kaj kiu estas la amanto kiu venas en tia horo fari muzikon sur straton tiel malpuregan? Mi vetas ke tio estas amindumaĵo al la servistino de la gastejo, kiu estas malbelulineto.

D. DIE.—Eble estas.

SIM.—Nun, ili komencas; ni aŭskultu. (*Oni ludas interne serenadon.*) Nu, mi konfesas ke ludas tre lerte la petola razisteto.

D. DIE.—Ne; ne ekzistas razisto kiu scias tion fari, kiel eble plej bone li scius razi.

SIM.—Ĉu vi volas ke mi rigardu iom tra la fenestro por vidi kiu...

D. DIE.—Ne, lasu ilin Kompatinduloj! Kiu scias la gravecon kiun ili donas al sia muziko? Mi ne ŝatas enuigi iun. (*Eliras el sia ĉambro donja Francisca, kaj Rita kun ŝi. Ambaŭ sin turnas al la fenestro. D. Diego kaj Simono apartiĝas kaj observas.*)

SIM.—Ĉu vi volas ke mi rigardu iom tra la fenestro por vidi kiu...

D. DIE.—Ne, lasu ilin. Kompatinduloj! Kiu scias la gravecon kiun ili donas al sia muziko? Mi ne ŝatas enuigi iun. (*Eliras el sia ĉambro D.^a Francisca, kaj Rita kun ŝi. Ambaŭ sin turnas al la fenestro. D. Diego kaj Simono apartiĝas kaj observas.*)

SIM.—Sinjoro, he! rapide, tien ĉi en anguleton.

D. DIE.—Kion vi volas?

SIM.—Ĉar malfermiĝas la pordo de tiu dormo ĉambro kaj estas eksterordinara flaro de subjupoj.

D. DIE.—Ĉu vere? Ni malantaŭeniru.

SCENO II

D.^a Francisca, Rita, D. Diego, Simono.

RITA.—Zorgeme, fraŭlino.

D.^a FRAN.—Laŭlonge la muro; ĉu mi ne bone marŝas? (*Oni ree provas la muzikilon.*)

RITA.—Jes, fraŭlino... Sed ili rekomencas ludi... Silenton!

D.^a FRAN.—Ne moviĝu... Ni eksciu unue se estas li.

RITA.—Ĉu kredeble li ne estas. La signalo ne povas mensogi.

D.^a FRAN.—Silentu. (*Ripetiĝas interne la antaŭa sonato.*) Jes, li estas! Dio mia! (*Rita alproksimiĝas al la fenestro, malfermas kaj donas tri manplauĉojn. La muziko ĉesas.*) Vidu, li respondas. Goju, koro! Estas li.

SIM.—Ĉu vi aŭdas?

D. DIE.—Jes.

SIM.—Kion do signifas tio?

D. DIE.—Silentu.

D.^a FRAN.—(*Rigardas eksteren tra malfermita fenestro. Rita restas post ŝi. La punktetoj elmon-*

tras la interrompojn, plimalpli longajn, kiuj okazas.) Mi estas... Kaj kion mi povis pensi ekvidinte kion vi faris?... Kia forkuro estas tiu? Rita (*ŝi apartiĝas de la fenestro, kaj poste returnas*), amikino, pro Dio, estu atenta, kaj se vi aŭdos bruon, avertu min tuj... Por ĉiam? Malfeliĉa mi! .. Bone, ĵetu ĝin... Sed mi ne bone komprenas... Ho; ve! don Felix, mi neniam vidis vin tiel timema... (*Letero estas ĵetata de ekstere en la teatron. D.^a Francisca serĉas sed ne trovas ĝin, kaj ree rigardas eksteren.*) Ne, mi ne kaptis ĝin, sed tie ĉi ĝi estas sendube... Kaj ĉu mi ne devas scii ĝis morgaŭ la kaŭzojn kiuj devigis vin forlasi min mortanta?... Jes, mi volas ĝin lerni el via buŝo. Via Francinjo ordonas tion al vi... Kaj kiel ŝajnas al vi ke estas la mia? Ĝi ne entenigas en mia brusto... Diru. (*Simono paŝas iom antaŭen, tuŝas la kaŝon kaj faligas ĝin.*)

RITA.—Fraŭlino, ni forkuru de tie ĉi... Rapide, ĉar estas homoj.

D.^a FRAN.—Malfeliĉa mi! Gvidu min.

RITA.—Ni iru. (*Elirante, Rita tuŝas Simonon. La du virinoj eniras rapidege la ĉambregon de D.^a Francisca.*)

D.^a FRAN.—Mi mortas!

SCENO III

D. Diego, Simono.

D. DIE.—Kia bruo estis tiu?

SIM.—Unu el la fantomoj kiu forirante tuŝis min.

D. DIE.—Alproksimiĝu al tiu fenestro, kaj rigardu se estas papereto sur la planko... Kia okazintaĵo!

SIM.—(*Palpante la plankon apud la fenestro.*)
Mi nenion trovas, sinjoro.

D. DIE.—Serĉu bone, ĝi devas esti tie.

SIM.—Ĉu oni enĵetis ĝin de la strato?

D. DIE.—Jes... Kia amanto estas tiu?... Kaj je dek ses jaroj kaj edukita en monaĥinejo... Nun estas finita mia tuta iluzio.

SIM.—jen ĝi estas. (*Li trovas la leteron kaj donas ĝin al D. Diego.*)

D. DIE.—Iru suben, kaj ekfajru kandelon... en la ĉevalejo aŭ la kiurejo, tie vi trovos ian lanternon... kaj revenu tuj kun ĝi. (*Foriras Simono tra la centra pordo.*)

SCENO IV

D. Diego.

Kaj kiun mi kulpiĝos? (*Sin apogante sur la posta parto de seĝo.*)... Ĉu la kulpulo estas ŝi, aŭ ŝia patrino, aŭ ŝiaj onkloj, aŭ mi?... sur kiun,—sur kiun falos tiu ĉi kolero, kiun mi ne povas haltigi, kvankam mi multe deziras ĝin subpreni?... Naturo faris ŝin tiel aminda je mia vido!... Kiom da flataj esperoj mi havis! kiom da feliĉeco mi promesis al mi!... Ĵaluzo!... Mi?... Je kia aĝo mi estas ĵaluzo... Estas honte... sed tiu ĉi maltrankvileco kiun mi sentas, tiu ĉi indigno, tiu ĉi dezirego de venĝo, de kie devenas ili? Ankoraŭ ŝajnas ke... (*Ekvidante ke sonas bruo ĉe l' pordo de l' ĉambro de D.^a Francisea li malantaŭeniras ĝis la fundo de l' teatro.*) Jes.

SCENO V

Rita, D. Diego, Simono.

RITA.—Ili jam foriris... (*Rita rigardas, aŭskultas, iras al la fenestro, kaj serĉas la leteron sur la plauko.*) Helpu min Dio!... La letero estas sendube tre bone skribita sed lia Moŝto D. Felix estas grandega fripono... Malfeliĉulineto!... Ŝi nepre mortos... Neniu, ne eĉ hundo estas sur la stra-

to... Domage estas ke ni konatiĝis kun ili... Sed tiu malbenita papero?... Se ĝi ne aperos, kion ni faros?... Kion ĝi diros? Mensogojn, mensogojn, nur mensogoj!

SIM.—Nun ni havas lumon. (*Li eniras kun lumilo, Rita surpriziĝas.*)

RITA.—Mi perdiĝis!

D. DIE. (*alproksimiĝante*).—Rita, ĉu vi tie ĉi?

RITA.—Jes, sinjoro, ĉar...

D. DIE.—Kion vi serĉas en tiu ĉi momento?

RITA.—Mi serĉis... Mi tuj diros.. Mi aŭdis bruon tiel grandan...

D. DIE.—Jes, ĉu?...

RITA.—Verege... Bruon, kaj... ekvidu, sinjoro (*ŝi levas la kaĝon kiu kuŝis sur la planko*), ĝi estis la kaĝo de l' turdo. Nu, ĝi estis la kaĝo, ne estas dubo... Ho, Dio! se ĝi mortis... Ne, ĝi vivas, nu, bone. Ia kato estis. Certe.

SIM.—Jes, ia kato.

RITA.—Malfeliĉa birdeto!.. Ĝi estas ankoraŭ tute timigita.

SIM.—Kaj pro granda kaŭzo. Ĉu vi ne pensas ke se la kato kaptis ĝin...

RITA.—Ĝi estus ĝin manĝinta. (*Ŝi pendigas la kaĝon sur najlo en la muro.*)

SIM.—Kaj lasinta ĝin sen plumoj nek...

D. DIE.—Donu tiun kandelon.

RITA.—Ha, permesu, ni ekbruligu tiun ĉi...

(*Si ekbruligas la kandelon sur la tablo*) ĉar la tempo kiu restas por dormi...

D. DIE.—Kaj ĉu D.^a Francinjo dormas?

RITA.—Jes, sinjoro.

SIM.—Nu, tio estas stranga ĉar pro la bruoj de l' turdo...

D. DIE.—Ni iru. (*D. Diego eniras sian ĉambron. Simono akompanas lin, kunportante unu el la kandeloj.*)

SCENO VI

D.^a Francisca, Rita.

D.^a FRAN.—Ĉu aperis la papero?

RITA.—Ne, fruŝino.

D.^a FRAN.—Kaj ĉu ili du estis tie ĉi kiam vi eliris?

RITA.—Mi ne scias. Estas vere ke la servisto kaj mi troviĝis subite, aperis kun lumilo, kvazaŭ per maŝino, inter li kaj lia mastro, nesciante kiel senkulpigi min. (*Rita prenas la kandelon, kaj de nove serĉas la leteron proksime de la fenestro.*)

D.^a FRAN.—Sendube estis ili... Verŝajne ili estis tie ĉi kiam mi parolis ĉe l' fenestro... Kaj ĉu tiu papero?

RITA.—Mi ne trovas ĝin, fruŝino.

D.^a FRAN.—Ili havas ĝin; ne dubu... Nur tio

mankis por plenigi mian malfeliĉon... Ne serĉu plu. Ili havas ĝin.

RITA. — Almenaŭ tie ĉi...

D.^a FRAN. — Mi frenezigaĝas! (*Ŝi sidiĝas.*)

RITA. — Kaj tiu homo ne senkulpiĝis, nek diris...

D.^a FRAN. — Ĵus kiam li ekkomencis klarigi, vi avertis min kaj mi deviĝis reeniri... Sed vi ne scias kiel timeme li parolis, kiel agitata li estis. Li diris ke per tiu letero mi ekscios la justajn kaŭzojn kiuj devigis lin foriri; ke li skribis ĝin por ke fidebla persono ĝin metu en miajn manojn, ĉar li supozis ke estos por li neeble vidi min. Ĉio trompaĵoj, Rita, de malfidulo kiu promesis kion li ne intencis plenumi.. Li venis, renkontis konkuranton kaj diris. Nu mi, kial mi enuigos iun, nek fariĝos mi defendanto de virino? Ekzistas tiom da virinoj! Ŝi edziniĝu! Mi nenion perdas. Mia trankvileco estas pli ŝatinda ol la vivo de tiu malfeliĉulino... Dio mia, pardonu! Pardonu, ĉar mi lin tiel amis!

RITA. — Ho, fraŭlino... (*rigardante la ĉambron de D. Diego*) ŝajnas ke ili venas.

D.^a FRAN. — Negrave, lasu min.

RITA. — Sed, se D. Diego vidos vin tiamaniere...

D.^a FRAN. — Ĉio jam perdiĝis; kion mi povas timi?... Kaj ĉu vi kredas ke mi havas forton leviĝi?... Ili venu, mi ne zorgas nun pri tio.

SCENO VII

D. Diego, Simono, D.^a Francisca, Rita.

SIM.—Komprenite; tio sufiĉas.

D. DIE.—Bone; oni selu tuj la mulon, dum vi tien iros. Se ili foriris, revenu, ekrajdu kaj baldaŭ vi atingos ilin... Ambaŭ tie ĉi; ĉu vi komprenas?... Nu, for, ne perdu tempon! *Ili interparolas apud la pordo de l' ĉambro de D. Diego, kaj Simono foriras tra la centra pordo.*)

SIM.—Mi foriras.

D. DIE.—Tre frumatene vi leviĝis, D.^a Francinjo.

D.^a FRAN.—Jes, sinjoro.

D. DIE.—Ĉu jam alvokis D.^a Irene?

D.^a FRAN.—Ne, sinjoro... Plibone estas ke vi tien iru vidi ĉu ŝi vekigis kaj volas sin vesti. (*Rita foriras la ĉambro de D.^a Irene.*)

SCENO VIII

D. Diego, D.^a Francisca.

D. DIE.—Ĉu vi ne bone dormis?

D.^a FRAN.—Ne, sinjoro; ĉu vi?

D. DIE.—Nek mi ankaŭ.

D.^a FRAN.—Estis tro varme.

D. DIE.—Ĉu vi estas malsaneta?

D.^a FRAN.—Iomete.

D. DIE.—Kio okazas al vi? (*Li sidigas apud D.^a Francisca.*)

D.^a FRAN.—Nenio... iom da... Sed ne... mi bone fartas.

D. DIE.—Io okazas, ĉar mi vidas vin malgaja, plorema, maltrankvila. Kio okazas, Francinjo? Vi scias ke mi tre deziras vian feliĉecon.

D.^a FRAN.—Jes, sinjoro.

D. DIE.—Do, kial vi ne pli konfidas al mi? Ĉu vi ne pensas ke estas por mi granda ĝojo vin komplezi?

D.^a FRAN.—Mi ja scias.

D. DIE.—Nu, kial havante amikon, vi ne malkaŝas al li vian koron?

D.^a FRAN.—Tial ke tio mem devigas min silenti.

D. DIE.—Tio signifas ke mi estas eble kaŭzo de via malĝojo?

D.^a FRAN.—Ne, sinjoro, vi neniel ofendis min... Ne estas vi kiu ofendis min.

D. DIE.—Do, kiu, filino mia?... Venu tien ĉi! (*Li alproksimigas plie.*) Ni parolu almenaŭ unu fojon sen elturniĝoj nek sekretoj. Diru al mi, ĉu ne estas vere ke vi rigardadas kun iom da malŝato la edziĝon kiun oni proponas por vi? Kion vi vetas ke, estante libera, vi ne edziniĝus kun mi?

D.^a FRAN.—Nek kun alia.

D. DIE.—Ĉu estas kredeble ke vi ne konas iun kiu amas vin kaj kiu meritas vian amon?

D.^a FRAN.—Ne, sinjoro; ne, sinjoro.

D. DIE.—Pensadu bone.

D.^a FRAN.—Ne, mi diras al vi, ne.

D. DIE.—Ĉu do, mi devas kredi ke vi konservas tian emon por la izoleco en kiu vi edukiĝis, ke vi pliamas la severecon de monaĥinejo ol vivadon...

D.^a FRAN.—Neniel, sinjoro, mi neniam tiel pensis.

D. DIE.—Mi ne obstinas pli demandi... Sed de tio ĉio kion mi ĵus aŭdis rezultas grava kontraŭdiro. Vi ne havas emon por religia vivado, verŝajne. Vi certigas min ke vi ne plendas pro kaŭzo mia, ke vi estas konvinkita ke mi multege estimas vin, ke vi ne pensas edniziĝi kun alia, kaj ke mi ne devas suspekti ke alia disputu vian manon... Nu, kial vi ploras? kial tiu ĉi grandega malĝojeco, kiu tiel rapide ŝanĝis vian vizaĝon, tiamaniere ke mi apenaŭ konas vin? Ĉu tiuj estas pruvoj ke vi amas nur min, ke vi ĝoje edziniĝos kun mi post malmultaj tagoj? Ĉu tiamaniere sin anoncas gajeco kaj amo? (*La teatro iom post iom lumigadis, kvazaŭ tagiĝus.*)

D.^a FRAN.—Sed kiel mi inspiras al vi tiajn dubojn?

D. DIE.—Kiel do? Se mi ne atentos tiujn konsiderojn, se mi rapidigos la preparadon de nia unui-

ĝo, se via patrino ankoraŭ aprobos, kaj fine alvenos la tago de...

D.^a FRAN.—Mi faros kion ordonos mia patrino, kaj mi edziniĝos kun vi.

D. DIE.—Kaj poste, Francinjo?

D.^a FRAN.—Poste... kaj dum mi vivos, mi estos honesta virino.

D. DIE.—Tion mi ne povas dubi... Sed se vi konsideras min kiel tiun kiu devas esti ĝis morto via kunulo kaj vja amiko, diru al mi, ĉu tiaj titoloj ne donas al mi rajton meriti ĉe vi pli da konfido? Ĉu mi ne povas koni la kaŭzon de via malĝojo? Ne por kontentigi maldecan sciamon, sed por dediĉi min al mia konsolado, plibonigante vian sorton, vin *de*igante feliĉa, se miaj klopodoj kaj penado tion povos.

D.^a FRAN.—Feliĉeco por mi? Tio jam finis.

D. DIE.—Kial?

D.^a FRAN.—Mi neniam diros kial.

D. DIE.—Sed kiel obstina, kiel malsaĝa silento! kiam vi mem devas supozi ke mi iom scias pri tio kio okazas.

D.^a FRAN.—Se vi ne scias ĝin, sinjoro don Diego, pro Dio, ne ŝajnu ĝin scii; kaj se vi efektive ĝin scias, ne demandu al mi.

D. DIE.—Bone, tial ke nenio restas por diri, ĉar tiu malĝojo kaj tiuj larmoj estas memvolaj, ni alvenos hodiaŭ Madridon, kaj post unu semajno vi estos mia edzino.

D.^a FRAN.—Kaj mi ĝojigos mian patrinon.

D. DIE.—Kaj vi vivados malfeliĉa.

D.^a FRAN.—Mi ja scias.

D. DIE.—Jen estas la fruktoj de edukado. Tio ĉi estas kion oni nomas edukadi konvene knabino, instrui ŝin neigi kaj kaŝi la pasiojn plej neprekaj per perfida kaŝemo. Oni konsideras ilin honestaj vidante ilin instruitaj pri la maniero silenti kaj mensogi. Oni obstinas ke nek temperamento, nek aĝo, nek animo influu sur la emojn, aŭ ke ilia volo skuiĝu laŭ la kapricoj de tiu kiu ordonas ilin. Ĉio estas permesata al ili, esceptinte sincerecon. Se nur ili ne diras kion ili sentas, se nur ili ŝajniĝas malestimi kion ili plej deziras, se nur ili konsentas elparoli jeson perfidan, malpian, deveno de tiom da skandaloj, jam estas ili dece edukitaj, kaj oni nomas bonega edukado tiun kiu inspiras ĉe ili la timon, la ruzemon, kaj la silenton de sklavo.

D.^a FRAN.—Estas vere... Ĉio tio estas certa... Tion oni postulas al ni, tion ni lernas ĉe la instruado kiun ni ricevas. Sed la kaŭzo de mia malĝojo estas multe pli granda.

D. DIE.—Ĝi estu kia ĝi estu, filino mia, necese estas ke vi kuraĝiĝu... Se via patrino ekvidos vin tiel, kion ŝi diros? Aŭskultu, ĉar ŝajnas ke ŝi jam leviĝis.

D.^a FRAN.—Dio mia!

D. DIE.—Jes, D.^a Francinjo, tre konvenas ke vi trankviliĝu iomete... Ne malesperu tiom... Konfidu al Dio... ĉar niaj malĝojoj ne estas ĉiam tiel gravaj kiel pentras ilin nia fantazio... Ekvidu, nur, kia malordo estas tiu ĉi! kia agiteco! kiaj larmoj!

Nu, ĉu vi promesas al mi ke vi prezentos vin kiel... kun iom da trankvileco?... Ĉu ne?

D.^a FRAN.—Kaj vi, sinjoro... vi bone konas la karakteron de mia patrino. Se vi ne defendos min, al kiu mi turnos min? Kiu kompatos tiun ĉi malfeliĉulinon?

D. DIE.—Via bona amiko... Mi... Kiel estas eble ke mi forlasu vin, karulineto, en la stato en kiu vi troviĝas? (*ekkaptante ŝiajn manojn*).

D.^a FRAN.—Ĉu estas vere?

D. DIE.—Vi malmulte konas mian koron.

D.^a FRAN.—Mi bone konas ĝin. (*Ŝi volas genufleksi; D. Diego malhelpas ŝin, kaj ambaŭ leviĝas.*)

D. DIE.—Kion vi faras, infano?

D.^a FRAN.—Mi ne scias... Kiel malmulte meritastian grandan bonecon, virino tiel nedanka por vil... Nedanka, ne, malfeliĉa... Ho ve, kiel malfeliĉa mi estas, sinjoro D. Diego!

D. DIE.—Mi bone scias ke vi dankas min kiel vi povas pro la amo kiun mi havas por vi. Lu tuta cetero estis .. kion mi scias?... eraro mia, kaj nenio alia... Sed vi, nepekulino, vi ne estas kulpa.

D.^a FRAN.—Nu, ĉu vi ne venas?

D. DIE.—Nun ne, Francinjo. Post kelkaj minutoj mi tien iros.

D.^a FRAN.—Iru baldaŭ. (*Irante á la ĉambro de D.^a Irene, ŝi revenas kaj, deirante, kisas la manojn de D. Diego.*)

D. DIE.—Jes, mi baldaŭ iros.

SCENO IX

Simono, D. Diego.

SIM.—Ili estas tie, sinjoro.

D. DIE.—Kion vi diras?

SIM.—Kiam mi trapasis la pordegon, mi vidis ilin jam rajdantaj malproksime. Mi ekkriegis kaj signaldonis per mantuko; ili haltis kaj tuj kiam mi alvenis kaj diris al la juna sinjoro kion vi ordonis, li returnen venis kaj nun estas malsupre. Mi rekomendis al li ke li ne supreniru ĝis kiam mi avertos lin, pro timo ke estu personoj tie ĉi kaj vi volu ke neniu lin vidu.

D. DIE.—Kion li diris kiam vi donis al li mian ordonon?

SIM.—Eĉ nur unu vorton. Kiel mortinto li estas... Mi ja diris, ne unu solan vorton. Mi malgajiĝis vidante lin tiel...

D. DIE.—Ne komencu jam propeti min por li.

SIM.—Ĉu mi, sinjoro?

D. DIE.—Jes, ĉu mi ne konas vin?... Kompaton!... Li estas fripono.

SIM.—Ĉar mi ne scias kion li faris...

D. DIE.—Li estas fripono kiu forprenos mian vivon... Mi jam diris al vi ke mi ne volas propetulojn.

SIM.—Estas bone, sinjoro. (*Li foriras tra la*

centra pordo. D. Diego sidiĝas, elmontrante maltraukvilecon kaj enuon.)

D. DIE.—Diru al li ke li supreniru.

SCENO X

D. Carlos, D. Diego.

D. DIE.—Venu tien ĉi, junulo, venu... Kie vi estis post kiam ni vidis nin?

D. CAR.—En la gastejo ekster muroj.

D. DIE.—Kaj ĉu vi ne eliris el tie dum la tuta nokto? ĉu ne?

D. CAR.—Jes, sinjoro, mi eniris la urbon, kaj...

D. DIE.—Por kio?... Sidiĝu.

D. CAR.—Mi havis bezonon paroli kun ia persono. (*Li sidiĝas.*)

D. DIE.—Bezonon?

D. CAR.—Jes, sinjoro. Mi devas al tiu persono multajn favorojn, kaj ne estis eble ke mi reiru Zaragozon ne vizitante ĝin antaŭe.

D. DIE.—Ja. Pro la multaj favoroj ricevitaj... Sed veni viziti ĝin je la tria horo matene ŝajnas al mi tre malkonvene... Kial vi ne skribis al ĝi leteron?... Rigardu, tie ĉi mi devas havi... Se vi estus sendinta al ĝi leteron kiel tiun ĉi en plej konvena horo ne estus necese vekigi ĝin tiel malfrue, nek ĝeni iun. (*Li donas al li la paperon kiu estis ŝetata*

tra la fenestro. D. Carlos tuj kiam li rekonas ĝin, redonas ĝin kaj li leviĝas por foriri.)

D. CAR.—Se vi do ĉion scias, kial vi alvokis min? Kial vi ne permesas ke mi daŭrigu mian vojaĝon, kaj vi ŝparus por mi respondon pro kiu nek vi nek mi estos kontenta?

D. DIE.—Via onkla Moŝto deziras scii kio okazas pri tio ĉio, kaj deziras ke vi ĝin rakontu.

D. CAR.—Kial vi volas plion scii?

D. DIE.—Tial ke mi tion volas, kaj mi tion ordonas. Atentu!

D. CAR.—Bone.

D. DIE.—Sidiĝu tie. (*D. Carlos sidiĝas.*) Kie vi konatiĝis kun tiu ĉi knabino? Kia amindumo estas tiu? Kiaj cirkonstancoj kunokazis? Kiajn promesojn vi interŝanĝis? Kie, kiam vi vidis ŝin?

D. CAR.—Reirante al Zaragozo la pasintan jaron, mi alvenis al Guadalaĥaro sen intenco halti tie, sed la administranto, en kies domo mi ripozis, obstinis ke mi restu tie tiun tutan tagon ĉar ĝi estis naskotago de lia parenco, kaj li promesis ke la sekvontan tagon li lasos min daŭrigi mian vojaĝon. Inter la personoj invititaj mi renkontis donja Francinjon, kiun la sinjorino venigis tiun tagon el la monaninejo tial ke ŝi sin amuzu iom... Mi ne scias kion mi vidis ĉe ŝi, tial ke ŝi vekis ĉe mi malkvietecon, deziron konstantan, nerezisteblan ŝin rigardi, ŝin aŭskulti, ŝin trovi apud mia flanko, paroli kun ŝi, igi min agrabla por ŝi. La administranto diris inter ceteraj aferoj... ŝercante... ke mi estas tre enamigita, kaj li ekpensis ŝajnigi ke mi

havas nomon D. Felix de Toledo. Mi helpis tiun fantaziaĵon, ĉar de tiam mi decidis restadi iom da tempo en tiu urbo, penante ke vi ne tion sciu... Mi observis ke donja Francinjo akceptis min laŭaparta ŝato, kaj kiam vespere ni disiĝis, mi restis plena je vaneco kaj esperoj, ĉar mi estis preferita inter ĉiuj ĉeestantoj, kiuj estis multaj. Resume... sed mi ne volas ofendi vin per la rakonto...

D. DIE.—Daŭrigu.

D. CAR.—Mi eksciis ke ŝi estas filino de sinjorino de Madrido, vidvino kaj malriĉa, sed el honesta familio... Estis necese konfidi al mia amiko la projektojn amajn kiuj instigis min restadi ĉe li; kaj li, nek aprobante nek mallaŭdante, trovis rimedojn tiel lertajn ke neniu el sia familio suspektis la kaŭzon de mia haltado. Ĉar lia kampdomo estas proksima al la urbo, mi facile iradis kaj venadis nokte... Mi sukcesis tiel ke D.^a Francisca legis kelkajn leterojn miajn, kaj laŭ la malmultaj respondoj kiujn mi ricevis de ŝi, mi fine profundigis en pasion kiu, dum mi vivos, igos min malfeliĉa.

D. DIE.—Bone... bonege, daŭrigu ankoraŭ.

D. CAR.—Mia servisto—kiu, vi ja scias, estas ruzema kaj vigla—per mil artifikoj kiujn li ĉiumomente eltrovis, ebenigis la multegajn malhelpaĵojn kiujn ni komence renkontis... La signalo konsistis el tri manplaŭdoj, al kiuj ŝi respondis per aliaj tri manplaŭdoj de fenestro kiu estas super la korto de l' monaĥinejo. Ni interparoladis ĉiunokte, tre malfrue, kun la mallaŭteco kaj prizorgo kiujn vi povas imagi... Por ŝi, mi ĉiam estis D. Felix de Toledo, oficiro de regimento, estimata de miaj

ĉefoj, kaj honorinda sinjoro. Neniam mi diris al ŝi pli, nek mi parolis pri miaj parencoj aŭ esperoj, nek mi diris al ŝi ke edziniĝinte kun mi ŝi povus esperi riĉecon; ĉar nek konvenis ke mi nomu vin, nek volis mi riski ke inklinigu ŝin je mia favoro konveneco anstataŭ pura amo. Ĉiutage mi trovis ŝin pli ĝentila, pli bela, pli aminda... Ĉirkaŭ tri monatojn mi restis tie; sed fine estis necese ke ni disiĝu, kaj ian malgajan tagon mi diris adiaŭ, ŝin lasinte sveninta, kaj mi foriris, blinda pro amo, kien miaj devoj alvokis min... Ŝiaj leteroj konsolis dum kelka tempo mian forestadon malĝojan, kaj en unu el ili, kiun mi ricevis antaŭ malmultaj tagoj, ŝi rakontis al mi kiel sia patrino volis edzinigi ŝin, kaj ke ŝi perdis la vivon antaŭ ol doni sian manon al alia krom mi; ŝi memorigis min pri miaj ĵuroj kaj admonis min plenumi ilin... Mi ekrajdis, veturis rapidege, venis al Guadalahaĥaro, ne renkontis ŝin, alvenis tien ĉi... La reston vi jam scias; ne estas necese tion rakonti al vi.

D. DIE.—Kaj kiajn projektojn vi havis en tiu ĉi alveno?

D. CAR.—Ŝin konsoli, ĵuri al ŝi ree eternan amon, veturi Madridon, vidi vin mem, ĵeti min al viaj piedoj, rakonti al vi ĉion, kaj petegi vin, ne riĉaĵojn, nek heredaĵojn, nek protekton, nek... nenion el tio,—nur vian permeson kaj vian benon por povi efektiviĝi unuigton tiel deziregitan, sur kiu ŝi kaj mi fundis nian tutan feliĉecon.

D. DIE.—Nu, vi ja vidas, Carlos, ke nun estas necese pensadi tute malsimile.

D. CAR.—Jes, sinjoro.

D. DIE.—Se vi amas ŝin, mi ank^{kaŭ} amas ŝin. Sia patrino kaj ŝia tuta familio aplaudas tiun ĉi edziĝon. Ŝi... spite la promesoj kiujn ŝi faris al vi... ŝi mem, antaŭ malpli ol duonhoro, diris al mi ke ŝi tuj obeos sian patrinon kaj donos al mi sian manon tuj kiam...

D. CAR.—Sed ne ŝian koron. (*Li leviĝas.*)

D. DIE.—Kion vi diras?

D. CAR.—Ne, tio ne... Ĝi estus ofendi ŝin... Vi efektivigos vian edziĝon kiam vi volos, ŝi kondutos ĉiam honeste kaj virteme, sed mi estis la unua, la sola celo de ŝia amo, mi tio estas kaj estos... Oni nomos vin ŝia edzo, sed se vi ofte, aŭ neofte, surprizos ŝin kun ŝiaj okuloj plenaj je larmoj, pro mi ŝi estos ploranta... Neniam demandu al ŝi la kaŭzon de ŝia malĝojo... Mi, mi estos la kaŭzo... La edĝemoj, kiujn vi vane penados subpremi, estos komplimentoj adresataj al forestanta amiko.

D. DIE.—Kia bravegeco estas tiu? (*Li leviĝas kolerigita, direktante sin al D. Carlos, kiu paŝas malantaŭen.*)

D. CAR.—Mi jam diris... Estis neeble ke mi diru eĉ vorton kiu ne ofendos vin... Sed ni finu tian abomenan interparoladon. Vivu feliĉe, kaj ne malamu min, ĉar mi neniel volis ĝeni vin. . La plej granda pruvo kiun mi povas doni al vi de mia obeemo kaj respekto, estas foriri tuj... Sed almenaŭ ne rifuzu al mi la konsolon scii ke vi pardonas min.

D. DIE.—Kiel, ĉu vi efektive foriras?

D. CAR.—Tuj, sinjoro... kaj mia forestado estos tre longa.

D. DIE.—Kial?

D. CAR.—Tial ke konvenas ke mi neniam revidu ŝin... Se la nuna famo pri baldaŭa militado efektiviĝos... tiam...

D. DIE.—Kion vi volas diri? (*Ekkaptante brakon de D. Carlos, li devigas lin alproksimiĝi pli.*)

D. CAR.—Nenion... Ke mi deziras militadon ĉar mi estas militisto.

D. DIE.—Carlos!... Kia abomenaĵo!... Ĉu vi havas kuraĝon tion diri al mi?

D. CAR.—Iu alvenas.. (*Li rigardas maltrankvile al la ĉambro de D.^a Irene, disiĝas de don Diego, kaj direktas sin al la centra pordo. Don Diego sekvas kaj volas malhelpi lin.*)

D. DIE.—Vi, kien iras?... Ne, sinjoro, vi ne foriros.

D. CAR.—Estas necesege... Mi ne volas vidi ŝin... Unu sola ekrigardo mia povus havigi al vi kruelan maltrankvilon.

D. DIE.—Mi jam diris ke vi ne foriros... Eniru tiun ĉambron.

D. CAR.—Sed se...

D. DIE.—Faru kion mi ordonas. (*D. Carlos eniras la ĉambron de D. Diego.*)

SCENO XI

D.^a Irene, D. Diego.

D.^a IRE.—Nu, sinjoro D. Diego, ĉu estas nun la horo ekveturi?... Bonan tagon... (*Ŝi estingas la kandelon kiu troviĝas sur la tablo.*) Ĉu vi preĝas?

D. DIE. (*promenante maltrankvile.*)—Ja, kiel preĝema mi estas nun!

D.^a IRE.—Se vi volas, oni povas nun pretigi la ĉokoladon, kaj averti la kondukiston por ke li jungu la ĉevalojn, kaj... Sed, kion vi havas, sinjoro?... Ĉu estas ia novaĵo?

D. DIE.—Jes, novaĵoj ne mankas.

D.^a IRE.—Kion do?... Diru, pro Dio!... Ho, vel vi ne scias kiel timigita mi estas. La plej malgrava okazo, tiel, subita, renversegas min tute... De mia lasta malbona akuŝo mi estas tiel eksterordinare delikata ĉe miaj nervoj... Kaj tio okazis antaŭ deknaŭ jaroj, aŭ eble dudek; sed de tiam, kiel mi diris, ia ajn bagatelo renversas min. Nek banoj, nek supo de serpentoj, nek konservaĵo de tamarindoj, nenio taŭgas; tiel ke...

D. DIE.—Fi! Ne parolu ni nun pri malbonaj akuŝoj nek konservaĵoj. Ni bezonas trakti aferon pli gravan... Kion faras tiuj knabinoj?

D.^a IRE.—Ili kunigas la vestojn kaj plenigas la vojaĝkeston, por ke ĉio estu pretigita kaj ne estu prokrasto.

D. DIE.—Bone. Sidiĝu... Kaj estas neutile timiĝi nek kriegadi, (*Ambaŭ sidiĝas.*) pro tio kiun mi tuj rakontos al vi. Atentu kaj ne nin forlasu la prudento kiam ni plej bezonas ĝin... Via filino estas enamiĝinta.

D.^a IRE.—Nu, ĉu mi ne certigis tion al vi milfoje? Jes, sinjoro, enamiĝinta ŝi estas; kaj sufiĉis ke mi tion diru, tiel...

D. DIE.—Tiu malbenita difekto interrompi ĉiun momente! Lasu min paroli!

D.^a IRE.—Bone, bone. Parolu.

D. DIE.—Ŝi estas enamiĝinta, sed ŝi ne estas enamiĝinta kun mi.

D.^a IRE.—Kion mi diras?

D. DIE.—Tion kion vi aŭdas.

D.^a IRE.—Sed kiu rakontis al vi tian sensencaĵon?

D. DIE.—Neniu. Mi ĝin scias, mi ĝin vidis, neniu rakontis ĝin al mi; kaj kiam mi tion diras al vi, mi povas bone certigi ke ĝi estas vera... Nu, kia esploro estas tiu?

D.^a IRE.—(*Plorante.*) Ve al mi!

D. DIE.—Kial do?

D.^a IRE.—Ĉar oni vidas min sola kaj senhelpa kaj ĉar mi estas malriĉa vidvino, ŝajnas ke ĉiuj malestimas min kaj konspiras kontraŭ mi.

D. DIE.—Sinjorino donja Irene...

D.^a IRE.—Je la fino de miaj jaroj kaj suferadoj, vidi min traktita tiel, kiel malnovan viŝtukon, kiel

malpuran Cindrinjon, laŭ oni povus diri... Dio helpu min! Se estus vivantaj miaj tri edzoj... Nur kun la lasta, se li estus vivanta, ĉar li havis humoron de serpento...

D. DIE.—Aŭskultu, sinjorino, mia pacienco preskaŭ finiĝis.

D.^a IRE.—Tiel ke tuj kiam oni kontraŭdiris lin, li ekkoleriĝis same kiel furiozulo el Infero, kaj ian tagon de Corpus Christi, mi ne memoras pro kia bagatelo, li tiel batfrapegis ian registaran oficiston kaj se du monaĥoj Karmenaj ne estus malhelpintaj, li estus mortiginta la malfeliĉulon premiginte lin kontraŭ stango kiu staras en la pordego de Sankta Kruco.

D. DIE.—Sed, ĉu estas eble ke vi ne atentis kion mi volas diri?

D.^a IRE.—Ha! ne, sinjoro, ĉar mi bone scias tion kion vi volas diri, kaj mi neniel estas naivega, ne, sinjoro... Vi ne amas plu la knabinon kaj serĉas ruzojn por eviti la devon kiun vi kontraktis... Filineto de mia animo kaj de mia koro!

D. DIE.—Sinjorino D.^a Irene, havu la bonecon aŭskulti min, ne respondante, ne dirante maloportunaĵojn, kaj poste, kiam vi scios tion kio okazas, ploru, ĝemu, ekkriu, diru ĉion kion vi volos... Sed atendente, ne pligrandigu mian suferadon, pro amo al Dio!

D.^a IRE.—Diru ĉion kion vi volas.

D. DIE.—Sed vi ne rekomencu ploradi kaj...

D.^a IRE.—Ne, sinjoro; mi ne ploras plu. (*Ŝi viŝas siajn larmojn per naztuko.*)

D. DIE.—Bone, do; de ĉirkaŭ unu jaro, iom pli iom malpli, D.^a Francinjo havas alian amanton. Ili ofte interparolis, skribis leterojn, promesis reciprokan amon, fidelecon, konstantecon... Kaj fine, ekzistas ĉe ambaŭ pasio tiel firma, ke malhelpaĵoj kaj foresteco, anstataŭ malfortigi, eĉ kunhelpis ĝin pligrandigi... Sub tiaj kondiĉoj...

D.^a IRE.—Sed ĉu vi ne komprenas, sinjoro, ke tio ĉio estas trompaĵo eltrovita de la skandalema lango kiu malamas min?

D. DIE.—Ni ree komencas kiel antaŭe. Ne, sinjorino, tio ne estas trompaĵo. Mi ripetas de nove ke mi tion scias.

D.^a IRE.—Kiel vi povas tion scii, sinjoro, nek kian verŝaĵnon havas tio? Tiamaniere la filineto de mia koro, enŝlosigita en monaninejo, fastinte ĉian vendredon kaj cetere, akompanita de tiuj sanktaj virinoj! Ŝi, kiu eĉ ne scias kia estas la mondo, kiu ankoraŭ ne eliris el la ovŝelo, por tiel paroli! Kiel, videble, vi ne konas la karakteron de *Circuncision*... Kia virino por pardonu la plej malgrandan peketon!

D. DIE.—Ni ne pritraktas nun peketon ian, sinjorino D.^a Irene; ni traktas pri honesta inklino, pri kiu ni ne havis antaŭan informon. Via filino estas knabino tre honesta, kaj ŝi ne estas kapabla fari malbonaĵon... Kion mi diras, tio estas ke patrino *Circuncision*, kaj *Soledad*, kaj *Candelaria*, kaj ĉiuj patrinoj, kaj vi, kaj mi precipe, ni ride-

ginde eraris. La knabino volas edziniĝu kun alia, kun mi ne... Ni alvenis malfrue; vi kalkulis tro rapide kun la konsenton de via filino... Sed, kial ni laciĝas? Legu tion ĉi paperon, kaj vi vidos ĉu mi estas prava. (*Li donas al ŝi la paperon de don Carlos. D.^a Irene ne legas ĝin, sed leviĝas tre agitata, direktas sin al la pordo de sia ĉambro kaj frapas. D. Diego leviĝas kaj probas vane malhelpi ŝin.*)

D.^a IRE.—Mi nepre freneziĝos!... Francinjo!... Virgulino de l' Tremedalol!... Rita!... Francisca!

D. DIE.—Sed kial vi alvokas ilin?

D.^a IRE.—Jes, sinjoro; mi volas ke ŝi venu kaj sciu kia homo vi estas.

D. DIE.—Ŝi ĉion difektis... Tio okazas al kiu konfidas al prudento de virino.

SCENO XII

D.^a Francisca, Rita, D.^a Irene, D. Diego.

RITA.—Sinjorino!

D.^a FRAN.—Ĉu vi vokis min?

D.^a IRE.—Jes, filino, jes; ĉar D. Diego agas kun ni laŭ modo kiu ne estas plu tolerebla. Kiajn amojn vi havas, infano? Al kiu vi promesis edziĝon? Kia konspiraĵo estas ĉi tiu? Kaj vi, granda friponino... vi ankaŭ devas scii... vi nepre scias... Kiu skribis tiun ĉi leteron? Kion ĝi diras? (*Prezentante la leteron malfermitan al D.^a Francisca.*)

RITA.—(*Flanken, al D.^a Francisca.*) Lia ĝi estas.

D.^a FRAN.—Kia malboneco!... Sinjoro D. Diego, ĉu tiamaniere vi plenumas vian promeson?

D. DIE.—Dio bone scias ke mi ne estas kulpa... Venu tien ĉi... (*Ekkaptante manon de D.^a Francisca li lokigas sin ĉe sia flanko.*) Nenion timu..., Kaj vi, sinjorino, aŭskultu kaj silentu, kaj ne devigu min fari sensencaĵon... Donu al mi tiun papeiron... (*Forprenante la paperon el la manoj de donja Irene.*) Francinjo, vi ja memoras la tri manplatbatojn de l' pasinta nokto.

D.^a FRAN.—Dum mi vivos mi memoros.

D. DIE.—Bone, do, jen estas la papero kiun oni ĵetis tra la fenestro... Ne timu, mi jam diris... (*Li legas.*)

«Karulino: Se mi ne sukcesos paroli kun vi, mi
 »faros ĉion eblan por ke vi ricevu tiun ĉi leteron.
 »Tuj kiam mi disiĝis de vi, kaj renkontis en la
 »gastejo tiun kiun mi nomis mia malamiko, ekvi-
 »dinte lin mi ne scias kial mi ne mortis pro doloro.
 »Li ordonis al mi ke mi tuj eliru el la urbo, kaj
 »estis necese obei lin. Mia nomo estas D. Carlos,
 »ne D. Felix. D. Diego estas mia onklo. Vivu ĉiam
 »feliĉa, kaj forgesu por eterne vian malfeliĉan
 »amikon, *Carlos de Urbina.*»

D.^a IRE.—Nu, ĉu tio estas?

D.^a FRAN.—Malfeliĉa mi!

D.^a IRE.—Nu, ĉu tio estas vera kion diris la sinjoro, grandega friponino? Certege vi memoros min. (*Si direktas sin al donja Francisca, kolerigite*

kaj volas ŝin frapadi. Rita kaj don Diego penadas malhelpi ŝin.)

D.^a FRAN.—Patrino!...

D.^a IRE.—Ne, sinjoro, mi mortigos ŝin.

D. DIE.—Kia frenezo estas tiu?

D.^a IRE.—Mi mortigos ŝin.

SCENO XIII

**D. Carlos, D. Diego, D.^a Irene, D.^a Francisca,
Rita.**

D. CAR.—Ne, ne. (*Eliras rapidege don Carlos el ĉambro, ekkaptas brakon de donja Francisca, kondukas ŝin al la fundo de l' teatro, kaj staras antaŭ ŝi por defendi ŝin. Donja Irene terurigas kaj deiras.*) Antaŭ mi neniu ofendos ŝin!

D.^a FRAN.—Carlos!

D. CAR.—(*Alproksimiĝante al don Diego.*) Senkulpigu mian trokuraĝon... Mi vidis ke oni insultis ŝin, kaj mi ne povis subpremi min.

D.^a IRE.—Kio estas tio kio okazas, Dio mia?... Kiu estas vi?... Kiaj agoj estas tiuj ĉi?... Kia skandalo!

D. DIE.—Tie ĉi ne estas skandaloj... Li estas tiu kun kiu estas enamiĝinta via filino... Ilin disigi kaj ilin mortigi estas tute same... Carlos... negrave... Prenu vian edzinon. (*D. Carlos iras kien estas donja Francisca, kaj ambaŭ genufleksas ĉe la piedoj de D. Diego.*)

D.^a IRE.—Ha, ĉu via nevo?

D. DIE.—Jes, sinjorino, mia nevo kiu per siaj manplaŭdoj, kaj sia muziko, kaj sia papero pretigis por mi la nokton plej teruran kiun mi pasigis dum mia tuta vivo... Kio estas, gefiloj miaj, kio estas?

D.^a FRAN.—Ĉu vi, do, pardonas nin kaj igas nin feliĉaj?

D. DIE.—Jes, gekaruloj de mia koro... Jes. (*Li devigas ilin leviĝi kun karesaj esprimoj.*)

D.^a IRE.—Cu estas eble ke vi decidu fari oferon?...

D. DIE.—Mi estus povinta ilin disigi por ĉiam kaj ĝuadi trankvile posedon de tiu ĉi ĝentila infano, sed mia konscienco malpermesas... Carlos!... Francinjo!... Kia doloriga sento lasas ĉe mia spirito la peno kiun mi ĵus faris! Ĉar, fine, mi estas homo mizera kaj malforta.

D. CAR. (*kisante liajn manojn*).—Se mia amo, se mia dankemeco snfiĉos konsoli vin pro tia perdo...

D.^a IRE.—Tial ke ĉi tiu estas D. Carlos! Nu, nu, mi...

D. DIE.—Li kaj via filino frenezigis pro amo, ĉar vi kaj la onkloj konstruadis kastelojn en la aero, kaj plenigadis mian cerbon je iluzioj kiuj malaperis kiel songoj... Tiel rezultas trouzo de rato, de subpremado de juneco, tiaj estas la certigoj kiujn donas gepatroj kaj zorgantoj, kaj tia la **konfido** kiun oni povas havi je la jeso de knabinoj... **Per ŝanco** mi ekkonis la eraron en kiu mi

troviĝis... Ho, ve al tiuj kiuj ĝin ekkonas tro malfrue!

D.^a IRE.—Resume, Dio igu ilin bonaj, kaj ili ĝojadu multajn jarojn... Venu tien ĉi, sinjoro, venu; mi volas ĉirkaŭpreni vin... (*D. Carlos kaj donja Irene ĉirkaŭprenas sin, donja Francisca genufleksas kaj kisas ŝian manon.*) Filino, Francinjo, vere vi faris bonan elekton... Li estas sendube bela viro... Iomete brunulo, sed li havas okulrigardon tre sorĉigan.

RITA.—Ja, diru tion, ĉar la knabineto nenie suspektis ĝin... Fraŭlino, milionon da kisoj. (*Donja Francisca kaj Rita kisas sin reciproke, elmontrante grandan kontenton.*)

D.^a FRAN.—Ĉu vi vidas kiom da ĝojo?... Kaj vi, ĉar vi amas min multe... ĉiam, ĉiam vi estos mia amikino.

D. DIE.—Bela Francinjo (*li ĉirkaŭprenas donja Francisca*), akceptu la unuajn ĉirkaŭprenojn de via nova patro... Mi ne timas plu la izolecon kiu minacis mian maljunan aĝon... Vi (*ekkaptante la manojn de donja Francisca kaj D. Carlos*), estos la ĉarmo de mia koro; kaj la unua frukto de via amo, jes, gefiloj miaj, tiu mem... nepre, tiu estos mia. Kaj kiam mi karesos lin ĉe miaj brakoj, mi povos ekdiri: Al mi devas la vivon tiu ĉi nepeka infaneto; se liaj gepatroj vivas, se ili estas feliĉaj, mi estas la kaŭzo.

D. CAR.—Benita estu tiom da boneco!

D. DIE.—Gefiloj, benita estu tiu de Dio.